

## Alokenlah Kesah Si Badia

Ogen: Johanes 20:19-23

Senin,  
01 Juni  
2020



**K**esah Si Badia eme pribadi Dibata si petelukan. Sipemena eme Dibata Bapa, si peduaken eme Dibata Anak (Jesus Kristus). I bas Pustaka Si Badia lit piga-piga penggelaren si ipake guna Kesah Si Badia eme Kesah Dibata (Kej.1:2), Kesah Tuhan (2 Kro.20:14), Kesah Kristus (Rm.8:9). Kerina enda seri nge si imaksudkenna eme Kesah Si Badia. Enda ka me pe si iembusken Jesus man ajar-ajarNa secara simbolis. Janah kedungenna maka i bas wari Pentakosta kalak Jahudi i je nusur Kesah Si Badia man kerina ajar-ajar Jesus. Erpalasken ogenta sendah maka ajar-ajar lit i bas kebiaren. Kebiarenna eme nandangi pemimpin kalak Jahudi perban wari Kamis si lewat enggo itangkapna Jesus janah wari Jumat enggo ipakukenna ku kayu persilang mate jenari ikuburken. I bas situasi kebiaren enda reh Jesus ku tengah-tengahna. IcidahkenNa baNa man kalak ndai tandana IA enggo keke i bas si mate nari. Emaka meriah kal ukur ajar-ajar ngidah Tuhan Jesus. Emaka nina Jesus, tetapkenlah ukurNdu, bagi Aku isuruh Bapa maka kam pe Kusuruh. Kenca bage isempulken Jesus KesahNa. Jadi si idah salah sada kawiten Kesah Si Badia ras ajar-ajar eme "ketetapan ukur ras pengutusen." Genduari pe enterem kita la tetap ukurta erdandanken erbage persoalen. Khususna pe sedekah enda kita enggo engkurung bana bagi ajar-ajar. Sendah i bas kerina kebiarenta nina Jesus, "petetap ukurNdu, janah suruhNa kita jadi saksiNa. Si jadi gegehta eme Kesah si embusken Jesus eme Kesah Si Badia. Kesah e ras kita tep-tep wari, mereken kita gegeh, semangat ras penampat. Kesah e jadi bukti Dibata ras kita.

☞ *"Kesah Si Badia si nemani kegeluhen kalak si tek i doni enda"*

## Temanilah Aku

Ogen: Masmur 71:17-18

Selasa,  
02 Juni  
2020



Pemasmur i jenda rukur (berefleksi) kerna perdalanen kegeluhenna. Tangkas teridah maka kitik-kitik nari ia enggo tek dingen ernalem man Dibata. Enggo melala pengalamen kiniteken si idalanina. Genduari ia enggo metua. Jenari nina ola kal aku itadingkenNdu, temanilah aku... Secara psikologi tentu banci si gejap kai si inanami pemasmur ras kai si jadi perbebenna. Kenca kita enggo metua tentu kadeta pe banci reh urakna secara daging kula, umpamana pegenenta, pemeginta, gegehta ras sidebanna. Emaka i bas kecibal si bagenda megati ka tersungkun ukurta, meherga denga nge aku, lit denga nge kalak si mehangke ras ngergai aku, inget kalak denga nge aku?

Bage me tentu secara pertendin perbeben pemasmur radu ras pertoton si sehkenna man Tuhan gelah ola kal ia itadingken janah gelah Dibata tetap banci nemani geluhna. Pemindon enda iumputi alu sada sura-sura si mehuli dingen mulia eme "maka ngasup aku ermomo kerna kuasa ras kinimbisanNdu, man kerina kesusuren si nandangi reh." Salah sada kebiarenta i doni enda eme adi la kita erteman. Tentu medungo geluh enda adi la lit sima-simanta. Saja sadar ka kita maka adi manusia pasti ersibar kal penemanina kegeluhenta. Erdandanken si e payo kal cara pemasmur nggeluh, maka Dibata ngenca akapna teman si tuhu-tuhu, emaka nina ola tadingken aku, temani min aku. Enda me pe si pernah ituliskan Joseph Medlicott kenca pedauh negara ia ras nandena maka ietehna Jesus ngenca teman si tuhu-tuhu jadi teman nandena KEE 198, "Ise Kin Ndia Temanta" KJ 453, Yesus Kawan Yang Sejati.

*"Salah sada si perluken kita eme nandai teman situhu-tuhu"*

# Encidahken Kiniteken

Ogen: Heber 11:1-6

Rabu,  
03 Juni  
2020



**I**bas jaman genduari enda, melala kasus investasi bodong nta pe palsu. Investasi enda mindo sen man nasabahna guna jadi modal janah erpadan guna mereken keuntungan si mbelin i bas waktu si kentsik man korban janah dana si itipu e seh kal belinna. Bageme kepeken adi dunia investasi i bas doni enda, banci nipu kalak, la keuntungan si idat, tapi kerugin si mbelin. Adi bage kal merincuhna manusia ngaloken keuntungan arah investasi i doni enda, si inget nge maka i bas kegeluhen kiniteken pe lit ka ngenda igelari investasi kiniteken? Kai si enggo silakoken guna sie?

Surat Heber pasal 11 nuriken man banta kerina pejuang-pejuang kiniteken si tuhu-tuhu enggo mpercayaken geluhna, menginvestasikan kerina si lit i bas ia i bas kiniteken man Tuhan. Lit lima tokoh Alkitab si ituriken ipujiken Dibata erkiteken kinitekenna, eme: Abil, Enoh, Nuah, Abraham ras Sara. Sada persaman i bas lima tokoh enda ituriken Surat Heber eme erkiteken kinitekenna.

Lima tokoh enda erjuang mereken dirina tek nandangi padan Dibata, seh maka amin gia kiniseran, perbeben, bagepe kematen ialakenna, ialokenna me ulih si la ternilai alu materi eme pasu-pasu, subuk i doni bagepe i surga i bas Dibata nari.

Mari erlajar kita i bas lima tokoh Alkitab enda, amin gia gundari melala kal perbeben ras kiniseran si nderpa geluhta, tetaplah paguh i bas kiniteken, tetap bangun kiniersadan ras Tuhan, muat bagin kita nampati teman, janah tek kita, i bas kerina si e pasti ibereken Dibata belinen, ergan asangken ngasup kita ngukurisa subuk gundari bagepe pagin geluhta.

☞ *“Pagu i bas kiniteken”*

## Cian Engkurangi Keleng Ate Ogen: Kejadin 37:1-11

Kamis,  
04 Juni  
2020



Jade Stringer eme sekalak siswi i salah sada sekolah i Amerika, si bunuh diri ekiteken i-bully teman-temanna, erkiteken iakap mejilesa rupana. Ia isiksa secara verbal i sekolah bagepe ribuan *chat* ras telpon si reh man bana tiap wari. Erkiteken la tahan ngalaken sie kerina, Jade Stringer bunuh diri alu gantung diri i kamarna.

Persoalen *bully* ntah pe perundungen eme masalah mbelin si jadi i bas dunia anak ras remaja genduari enda. *Bully* jadi la terjeng secara fisik bagi ipekpek ras sidebanna, tapi pe melala secara verbal alu kata-kata si merendahkan, bagepe lewat media-media sosial. Melala kal si idah video-video *bully* si enggo viral i bas media, janah melala ka pe pelakuna enggo itangani kepolisian.

*Bully* kepeken sada masalah si nai i bas Pustaka pe enggo si idah kinatana, eme i bas kegeluhen Jusup. Jusup si ngaloken keleng ate ras perlakuan istimewa i bas bapana nari mpeturah ate cian i bas senina-seninana. Ate cian e reh dekahna reh belinna, seh dungna ku bas perencanaan munuh. Cian ate e kepe ngurangi keleng ate, seh maka dungna idayaken seninana Jusup, janah ibualina bapana Jakup. Ope idayakenna, italangina baju Jusup, emaka iras-raskenna namakensa ku sumur. Sada arihna ngelakoken si jahat man seninana.

I bas kinata kegeluhenta mungkin saja melala kasus *bully* si idah ntah pe maun jadi i bas jabunta, ntah pe kita pernah jadi pelaku ntah korban. Mari si persingeti gelah ula reh dekahna perilaku *bully* enda jadi i bas geluhta, sibenaken alu ngikis biak cian ate, jenari si babai dirinta, si ajarken anak jabunta guna ngasup ngergai kerina jelma uga pe ia.

➤ "Kisah Si Badio si nemani kegeluhen kalak si tek i domi enda"

# Dayaken Saja Ia

Ogen: Kejadin 37:18-28

Jumat,  
05 Juni  
2020



**K**ejadin enda ituriken erpalasken Kejadin 37:18-28, kerna perbahannen si ilakoken erkiteken nembeh ate bage pe cian ate. Senina-senina Jusup ernembeh ate man bana erkiteken nengan ate bapana Jakup man Jusup. Senina-seninana ersura-sura lako erbahan si jahat man Jusup. Sura-sura e iarihkenna tupung seninana e ermakan i mbalmbal. I bas arih-arihnana emaka ibahanna sada kesimpulena lako munuh Jusup. Arih si nggo ersada lako munuhsa, iolangi si Ruben, sabap ersura-sura ia nampati Jusup emaka ikatakenna madin Jusup iambekken ku bas sada sumur. Rencana lako munuh Jusup pe la sahun ilakoken erkiteken tupung paksa ia ngadi-ngadi mentas rombongan kalak Ismael i bas perdalanan i Gileat nari ku Mesir. Emaka kedungenna idayakan senina-seninana me Jusup man rombongan kalak Ismael e alu erga dua puluh duit pirak. Perbahannen senina-seninana e i rahasiakenna man bapana alu ngatakan maka Jusup nggo ipan rubia-rubia si merawa janahna ncidahken jubah Jusup si enggo icaingkenna dengen i celupkenna ku bas dareh kambing. Cerita Jusup si idayakan senina-seninana eme sada contoh kasus kekerasen si ilakoken nandangi sekalak anak. I bas jaman gundari pe melala si begi berita arah media sosial, televisi bage pe berita surat kabar maka la sitik jadi kekerasen nandangi anak-anak. Peran serta selaku orang tua perlu si tingkatken gelah anak-anakta la jadi korban bage pe pelaku kekerasen. Arahenn, bimbingan bage pe didiken orang tua perlu ilakoken man anak-anak. Bage pe si silahilah ngelakoken kekerasen nandangi anak-anakta subuk i bas perbahannen bagepe pengerana.

“Ajarkanlah si mehuri gelahna kerina jadi mehuri”

# Mereken Usihen

Ogen: 1 Samuel 12:1-4

Sabtu,  
06 Juni  
2020



Tupung Samuel minpin bangsa Israel, melala kal usihen si mehuli si icidahkenna man bangsa Israel. I bas umurna si nggo metua, ngerana ia man bangsa Israel, nina: "tapi aku nggo metua janah ubanen janah anak-anakku enggo ras kam. Aku enggo jadi peminpin mulai kin sanga aku nguda seh genduari. Enda kap aku. Adi lit kin kubahan si salah, adukenlah aku genduari i lebe-lebe Tuhan ras raja si enggo ipilihNa. Lit kin enggo kubuat lembu entah kelede kalak? Lit kalak enggo kutipu entah ku paksa? Lit kin enggo kwaloken sogok i bas ise nari gia? Adi lit kin enggo kulakoken apai gia i bas si enda nari, kugalari mulihi kai si enggo kubuat."

Selaku pemimpin bangsa Israel, Samuel enggo mereken contoh mehuli si man usihen bangsa e. I bas masa kepeminpinenna la pernah nundalken Dibata, ia tetap erkemalangen man Dibata dengen tetap ndahiken dahin minpin bangsa Israel gelah tetap nggeluh dengen ngelakoken si mehuli si ngena ate Dibata. Kata si ibelasken Samuel "adi lit kin kubahan si salah, adukenlah aku genduari i lebe-lebe Tuhan ras raja si enggo ipilih Dibata" encidahken maka Samuel la pernah erbahan salah tupung ia enggeluh minpin bangsa Israel.

Selaku kalak kristen si ngakuken Dibata jadi Tuhan si engkawali, arusna mereken usihen si mehuli nandangi doni enda; umpamana: pengerana, perbahanen mehuli, peruis pe mehuli. Bagepe i bas erbage dampar kegeluhen, caranta ngalaken persoalen pe payo min, terbuka, la lit erbuni dengen adi lit kesalahan pang ngalaken ras ngaloken resikona. Gelah arah kerina si idahiken kita nuduhkan maka kita eme anak-anak Dibata.

☞ *"Cidahkenna usihen si mehuli nandangi doni enda"*

# Kam Manusia Si Mbaru

Ogen: Kolose 3:5-11

Minggu,  
07 Juni  
2020



**N**ick Vujicik tubuh la ertan ras tapak-tapak nahena leket ku awakna. Tantang tubuh nari seh asa umur 9 tahun la teralokenna bana. Nterem ka kalak si nokoh perban daging kulana la

“biasa.” Tapi genduari ia enggo dewasa, erjabu ras sekalak diberu si mejile rupana ras lit ka enggo anak ipupusna. Ia jadi *motivator* eme si ngerana guna mpekeke semangat kalak si deban. La ernae la ertan tapi beluh erkai pe. Motto geluhna, *tan ras nahe man kalak si lemah, man kai tan ras nahe adi lit Dibata ras kita.*

Uga maka banci ia percaya diri ras ngasup mpegegehi kalak alu kondisina? Rahasiana eme perkuah ate Dibata si maler man orangtuana si ngasup ngaloken anakna uga litna, erjuang ras ertoto mpebelin ia. Labo lit bedana kerina manusia, kerina si ngaloken Tuhan Jesus eme manusia si mbaru. Kerina banci ngaloken keleng ate Tuhan ras keleng ate bas manusia nari. Layak ka engkelengi ras ncidahkan talenta ras keriahen selaku kalak si nggo ibebasken Tuhan. Kalak si ibatasi perkembangan dirina selaku kalak si nggo ibebasken, banci jadi kalak si tertekan. Adi nggo bage, tentu pengkelengina dirina pe jadi kurang (*low self esteem*). “Adi labo lit si ngergai aku, aku la meherga” bage ukurna. Jadi perlu kal si bangun rasa percaya diri anakta, gelah ula ia minder. Uga carana? Ingetlah maka kita ras anakta e tempas Dibata. Tempas Dibata si terus ipelimbarui. Alogen kekurangan anakndu, ula merawa, ula isakken ia arah babahndu nari. Pandang bas salahna ula hakimi. Pujiken bas si mehuli, pake kata-kata si erbahanca meherga akapna bana. Kita jadi motivator man anak-anakta.

☞ *“I bas babahndu nari ndarat racun ras madu, apai pilihndu”*

## Perdiatekenlah Kepentaren

Ogen: Kuan-kuanen 5:1-14

Senin,  
08 Juni  
2020



**S**ekalak guru hikmat tetap mereken pengajaren man ajar-ajarna. Pengajaren e kerinana guna kiniulin kegeluhen. Ise si mperdiateken kepentaren, beluh rukur, pengeranana mehuli, ietehna uga erlagu langkah si payo seh maka geluhna mehaga. Tapi si la mperdiateken kepentaren bene kemulian geluhna. Bagenda me ia ngajari ajar-ajarna khususna gelah metenget nandangi diberu-diberu si pendahinna erlua-lua (pelacur). Enda sada pengajaren moral si perlu ipatuhi. Ibahan guru hikmat e sada anding-andingen kerna biber pelacur entebu desken tengguli, janah kata-katana daliten asangken minak. Tapi adi iikutken kata katana e maba kematen. Sabap kata-kata e situhuna bual kerina, tempa mehuli, lang kepe, situhuna macik si rehna bas pusuhna nari. Diberu sibage pasti la ndatken umur si nggedang, erkiteken geluhna la ertentun. Selain la ermoral, ia la make akal sehat bas ndalani kegeluhenna. Sabap la dirina saja icedaina tapi gelah kalak pe. Teridah arah pengajaren guru hikmat enda maka adi murid emperdiateken kepentaren, geluhna terarah, teratur, teridah arah lagu langkah si mehuli. Kai pe si ibelasken ras si idahikenna kerina erpalasken akal sehat. Ulihna kegeluhenna mehuli ras mehaga tapi si la mperidiateken pengajaren hikmat, geluhna la ertentun, kai pe si ibahanna guna kenikmaten si kentisik ngenca. La maba kegeluhen si mehuli. Emaka pengajaren guru hikmat, ula deheri diberu perlua-lua si la mperdiateken pengajaren. Mehuli kal pengajaren enda man banta, guna si perdiateken, si tamaken bas pusuh gelah kepentaren e ngkuasai perukuren, pengerana ras perbahanenta.

☞ *"Begiken dengen dalanken kepentaren"*

# Njemba Arah Pertoton

Ogen: 2 Timotius 1:3-6

Selasa,  
09 Juni  
2020



**T**imotius anak Eunike kempu Lois, kitik-kitik nari enggo teridah bakatna i bas Kata Dibata ras pelayanen. Biakna enda idatca i bas pengajaren nandena bage pe ninina si ngajari ras si nuduhkan man bana kerna kiniteken. Bas umurna kitik denga enggo iikut-ikutna Rasul Paulus, janah kenca ia cukup dewasa aminna nguda denga pe ipercayakan Paulus sada perpulungen guna ikep-kepna. Sada tanggungjabap si mbelin.

Eunike nini, Lois nandena ras Rasul Paulus bapa rohanina, tuhu-tuhu tama ngaruh ku bas mpebelin talenta Timotius bagepe kinitekenna. Emaka aminna pe mawen jumpa perbeben tetap ia ngasup jadi usihen erkiteken topangan bas orangtuana kerina, subuk i bas pengajaren bagepe bas pertoton. Kurang lebih serilah ras topangan ras dukungan orangtua Lyodra br Ginting, pemenang Indonesia Idol 2020. Nande ras bapana lampas ngidah talenta anakna e, iarak-arakna alu mereken fasilitas, ndarami festival rende gelah banci ikut anakna lomba. Sanga pertandingan Indonesian Idol i Jakarta pe la pernah absen ndukung anakna. Emaka labo mamang ateta beru Ginting ndai percaya diri kal.

Tep-tep anak eme pemere Tuhan. Setiap anak unik. Dukungenta i bas minat ras talentana erbahanca tetap ukurna. Mawen la tehna kai talentana, jemba alu pertoton. Mawen ngelabuh ia, jemba alu pertoton. Mawen la bias gegehta ngarak-ngarak kinibeluhenna, ertotolah. Pertoton sekalak nande eme restu nandangi masa depan anak. Tep-tep lawes anakta sekolah menaken kitik-kitik nari totokenlah anakta e ras pasu-pasu takalna tupung ia berkat sekolah.

☞ "Dukungen nande eme gegeh si mbelin man anak"

# Nggit Erlajar

Ogen: Kuan-kuanen 1:7

Rabu,  
10 Juni  
2020



**E**nggo setengah perdalinen si dalani tahun Informasi Teknologi i bas tahun 2020 enda. Melala kita erlajar subuk i bas ulih si negatif ras positif si jadi bas geluhta. Min si negatif la silakoken sabap sie banci meneken kita tapi adi si positifna banci si pake guna kemajun i bas geluhta. Umpamana i bas dampar pendidikan, ekonomi bagepe spritualitas hubungan ras Tuhan rikut pe hubungan ras keluarganta. Perkembangan teknologi enda banci si idah arah perkembangan media sosial seh kal pedasna, la terjeng i kota tapi pe seh ku kuta-kuta kerina kalak enggo jadi pengguna media sosial. Arah media sosial banci nambahi teman nambahi melala pemeteh, bage pe nandai biak enterem jelma, maka biak sikugapa pe lit nge i bas doni enda. Emaka ula min sempat media sosial enda mpengaruhi kegeluhenta, terlebih selaku pernanden si sangana iperluken anak-anakta, taren er-facebook lanai lit waktunta guna anak-anakta, komunikasi ras pasangenta pe nggo reh urakna. Perlu kal kita pentar makeken media sosial enda. Janah pe perlu tetap erlajar sabap tiap wari lit saja lalap si mbaru, si lenga pernah si pelajari. Melala pemeteh si banci si dat arah media sosial, erlajar kerna tutorial er-make up, aneka resep banci si pelajari ras si praktekken man keluarganta. Uga kita banci erbisnis arah online. Rapat kerna program kerja enggo banci on line, khotbah on line. Bagepe njaga kesehaten arah kita nggit erlajar ertambahna pemeteh ta reh beluhna kita. Saja uga gia majuna teknologi enda, tetaplah pakeken alu erkemalangen man Tuhan.

➤ *"Segedang geluhta pakeken kesempatan guna tetap erlajar"*

# Mekeng Mpereh Mara

Ogen: Keluaren 9:8-12

Kamis,  
11 Juni  
2020



**I**bas sada pemeriksaan kesehatan gratis si ilakoken Gereja i sada kuta, lit sekalak nande si ikataken ia lit pinakitna eme asam urat. Tapi la ia tek man dokter si meriksasa, sabap nande enda seleh kal man bagian dalam manuk entahpe babi. Janah ieteh nande enda, adi kalak si enggo kena asam urat, lanai banci man pangan si tinggi kadar asam uratna, contohna eme kai si ia seleh ndai. Kerina keluarga pe enggo melala mereken pedah man nande enda gelahna mpengadi hobina man tuka manuk ras babi. Nande enda pe enggo mulai rusur nggejapkan mesui i sekitar jari-jari nahe, tapi aminna pe bage, tetap denga ipanna kai si iakapna entabeh mansa. Janah kedungenna pinakit nande enda tambah mekelek ras lanai tertolong nari. Kai si terjadi i bas nande enda ndai, enggo ilakoken Piraun i bas Kata Dibata si jadi perenungenta enda. Tulah si berupa pinakit bareh enda eme tulah si peenemken, enda terjadi erkiteken la mbegiken Musa ras Harun, janah situhuna la ia megiken kai si isuraken Dibata eme mbebasken bangsa Israel. Raja Piraun tetap i bas ukurna, aminna pe enggo terjadi pinakit si mekelek i bas bangsana.

I bas kegeluhenta enda, kimawen enggo litna pe bencana entah pe pinakit, lit denga ka kita tetap mekeng ras mpetetap ukurta ibas cara rukur si la payo. Perukuren si bage, la saja ngenca ngerugiken dirita, tapi banci saja mengorbanken kalak si deban bagi wabah pinakit si terjadi man bangsa Mesir ndai. Emaka arah renungen enda Dibata mpersingeti kita gelahna kita nggit mperobahi cara rukurta adi memang enda iperluken guna keselamatenta radu ras.

☞ "Kalak si malang man Tuhan sangap, adi mersik ukurndu, bene me kam"

## Pinakiten Erkiteken La Patuh

Ogen: Ulangen 28:20-24

Jumat,  
12 Juni  
2020




Lit sada penelitian si ilakoken ahli pendidikan i Amerika si meneliti pendidikan kepatuhan man manusia. I bas penilitian enda sekalak guru namaken bon-bon ras coklat ku sada toples, janah ikataken maka anak-anak enda la banci muat ntah man bon-bon ras coklat enda adi lenga ibagikenna, janah itadingkenna anak-anak e kentsik guna ndahiken dahinna i kantor. Emaka nina "kari kenca mulihken ku kantor pasti kerina daten." La iteh anak-anak ndai enggo ipasang CCTV guna ngenen kai si ilakokenna. Kenca piga-piga menit enggo mulai lit sekalak anak si mbuka toples ras ibuatna bon-bon ras cokelat ndai, erkiteken iidahna lit temanna si pang ngelakokensa, emaka iikutken teman-temanna sideban ka. Lit anak si la patuh ras lit ka si patuh nandangi aturen si ibereken guruna ndai. Emaka penilitin enda pe inehen 30 tahun kemudian, kepeken anak-anak si la patuh ndai teridah maka kegeluhenna la bagi ukur, deba jadi penjahat, anak si patuh kegeluhen berhasil ras sukses. Enda me si jadi renungenta enda. Dibata mereken undang-undang man bangsa Israel kuga arusna tading i bas taneh si enggo ipadankenNa man bangsa e. Kepatuhen mereken pasu-pasu ras kemalaman ate, janah kelapatuhen mpereh pinakit bagepe mara sidebanna man bangsa e. I bas tahun 2020 enda, mulai mewabah pinakit Covid-19 i belang-belang doni enda, seh pe ku Indonesia. Janah pemerintah ras WHO enggo mereken aturen ras rusaha ncegah penyebaran pinakit enda. Melala kalak si la patuh ras la peduli nandangi aturen e. Penyebaran pinakit enda la terkendali, ratusan ribu kalak si kena pinakit Covid-19 enda. Bage me ulihna kelapatuhen i bas kegeluhen enda.

☞ "Ikutkenlah Tuhan Dibatandu maka kerina pasu-pasu e jadi sikerajangennu"

# Dibata Nguji Arah Pinakit

Ogen: Jop 2:1-10

Sabtu,  
13 Juni  
2020



Ujin (ujian) labo saja ipake i bas istilah anak sekolah guna namatken persekolahen entah pe perkuliahenna. Tapi ujin bas kegeluhen pe seh man kerina kalak si nggeluh i bas doni enda. Terkhusus man kalak si erkiniteken, maka i bas ujin e perlu ipergermetken, entah kin bekas pengeleginta, entah i bas ijin Dibata guna nguji kinitekenta man baNa. Jop sekalak dilaki i Negeri Us, sekalak si erkemalangen man Dibata. Ia sekalak si mehuli, labo lit perbahanenna si jahat. Ia sekalak bayak namura i Timur. Labo Dibata ngenca mperdiatkeken ia tapi iblis pe ersura nge guna meteh uga nge Jop enda erkiniteken i bas kegeluhenna adina ibahan pengujin man bana. Ikataken i bas ayat 5 "Tapi, genduari, bicara isakitiNdu badanna, uga pa pe isumpahina me Kam iadep-adepenNdu!" Alu ranan si bage me maka iendesken Tuhan me Jop i teruh kuasa iblis, saja ola ibuatna kesah Jop. Pinakit si jadi man Jop mahanca tuhu-tuhu suhsah iakapna, nggergosa pe nggo alu pecah-pecah kudin taneh ibahanna. Ndeharana pe nguji ia ka alu ngataken "Lalap denga nge atendu erkemalangen man Dibata? Sumpahilah IA jenari mateken bandu!" Amin bage gia, Jop la ia nilah sitik pe i bas Dibata nari. La lit ibelaskenna cakap si la mehuli kerna Dibata.

Adi si ukuri, pengujin erkiteken pinakit mesunah kal njolah-joleken kiniteken. La sitik kalak Kristen si la lulus i bas ujin si bagenda. Lit si ndarami tambar man guru-guru ntah numpahi Dibata ras sidebanna. Arah renungenta wari enda Jop enggo jadi usihen man banta, ia tetap setia amin gia melala pengaruh i sekelewetna.

☞ "Tetap setia bas pengujin"

# Ku Pepalem Kam

Ogen: 2 Raja-raja 20:1-11

Minggu,  
14 Juni  
2020



Kalimat tema "Kupepalem kam" sada statement si enggo pasti. Si melaskenca pe pasti, si ngalokenca me tuhu-tuhu tek. Pernyataan enda mahanca lega. Terlebih nandangi sekalak si enggo cukup ndekah sakit, adi litlah kata-kata i bas pertoton entah kata-kata si ngapuli mereken gegeh si ngatakenca kam enggo malem. Pasti "Amiiinnn" nina dem alu pengarapen. Em luar biasana pengarapen malem i bas sakit pinakit nari.

I bas ayat 1 lit berita si mahanca ceda ate "Ersikaplah kam guna kematendu!" bage me nina Nabi Jesaya man Raja Hiskia. I bas kegogon atena minter inget Hiskia Tuhan, iturikenna i bas totona maka sedekah enda tutus kal atena dengen erkemalangen kempak Tuhan, ngelai Tuhan dengen ndalanken bagi si ngena ate Tuhan. Emaka ope denga pe Nabi Jesaya mentasi kesain istana si arah tengah enggo ia mulihken isuruh Tuhan ku Raja Hiskia guna ngatakenca: "...Kupepalem kam, Kutambahi umurndu 15 tahun".

Kata ersikaplah nandangi kematendu tentu sangat kontradiksi ras kupepalem kam. Ibaratna enggo kitik ukur, bene pengarapen. Menghadapi kematen, nadingken kerina keluarga, pendahin ras kerina si lit i bas doni enda. Ibarat kalak si iderpa perbeben pinakit si tuhu-tuhu mberat, enggo lit kata i bas dokter maka kegeluhenna tading 2 minggu nari. Labo i bas waktu ndekah, rempet ka ermegah ate kepe ipepalem mulihi, la sahun nadingken kerinana i bas doni enda, ipegedang ka umur nggeluh. Kerina enda banci jadi erdandanken perkuah ate Tuhan. Sabap Tuhan si mada kegeluhen, si ngaturkenca, si ngidah kerina perbahanen manusia, si banci nalihken ukurna i bas pertimbangan si ibahanNa. I bas paksa sakit (subuk fisik entah perasan) ertoto erpengendeslah. Ercakap-cakaplah ras Tuhan Teklah! Malem me kam.

☞ "Diberu seri haknya ras dilakji ibas doni siitepa Dibata"

## Minter Itambari

Ogen: Markus 1: 30-31

Senin,  
15 Juni  
2020



**S**epanjang tahun i bas piga-piga daerah mbue si mate erkiteken pinakit DBD. Pinakit enda pernah pe igelari epidemic, sabap menyerang enterem jelma alu meter i bas sada

wilayah. Si mbaru enda jadi eme Corona, igelari pandemic, maksudna pinakit si nerang enterem jelma alu meter i bas erbage-bage wilayah i doni enda. Sakit pinakit em salah sada si jadi kebiaren si mbelin man manusia. Tapi ise kin la sakit i babo doni enda?

Mami Petrus sangana magin paksa Jesus seh ku rumahna. Kondisina demam, makana la teralo-alosa Tuhan Jesus. Isi jabu e minter nuriken man Tuhan Jesus kerna kondisina, jenari idahi Jesus ras itambariNa mami Petrus ndai salu kuasaNa. Malem mamina ndai jenari maka ngasup ia ngelai Tuhan Jesus si kesilang i rumahna.

La banci kita engkelengi kalak adi la si kelengi banta. Arus rusur si inget "di dalam tubuh yang sehat tersimpan jiwa yang kuat." Makana adi ateta sehat banci si lakoken si erguna bas kegeluhenta enda, jagalah kesehaten kula ras tendinta. Salah sada cara njagai kesehaten eme, rutin meriksaken kesehatenta. Adi lit sitik gejala-gejala pinakit jilen me ula melantar.

Adi lit kurang kesehatenta mehuli kal ertoto kita lebe man Tuhan, jenari alu kuasa kepentarenNa si periksaken banta ras minterlah si tambari. Sakit e labo genjeng, labo mela adi sakit, tapi ertambar. Dibata erkuasa mpepalem pinakit subuk arah kuasa bagepe arah tambar-tambar si lit. Adi sakit minterlah tambari. Ula si pediat mekelek lebe maka kita ertambar. Si tambari dingen si totoken pe.

☞ *"Kulanta e titipen Dibata, jaga!"*



# Ngerunggui BangsaNa

Ogen: Hakim-hakim 4:4-10

Rabu,  
17 Juni  
2020



Luar biasa, i bas jamanna nai, Debora enggo ndatken sada pengakun ras pengergan i bas masyarakat si mpehaga dilaki (patriarki). I bas 10 kalak hakim-hakim paksa e si tugasna ngerunggui ras mimpin bangsa Dibata salah sada eme sekalak diberu si tergelar Debora. Kantorna teruh batang kurma, ku je me rehen kalak Israel guna nungkun ras mindo keputusan kerna geluhna. Guna dahin enda tentuna Debora arus nikapken dirina alu kepentaren, kebujuren, keadilan guna keputusan kegeluhen bangsa e. La terjeng je, ia pe mperdiateken kegeluhen bangsa enda si sangana ikuasai Raja Jabin, panglimana tergelar Sisera.

Bangsa enda arus erjuang guna ngelawan si njajah ia, emaka idilo Debora Barak jadi pemimpin bangsa enda ngelawan kalak Kanaan tapi la ia nggit berkat adi la ras Debora, emaka nggit Debora radu ras berkat ku medan perang. Bagenda me 'sepak terjang' kegeluhen Debora i bas ngerunggui kegeluhen bangsa enda. Wari enda, sibenaken me musyawarah pelayanen (MUPEL) Moria, si i je ingan arih-arikh ras runggu kerna pelayanen Moria GBKP subuk si enggo ilakoken, isehken me lapuren pertanggungjawabenna janah kai-kai saja nuate ilakoken i bas paksa si reh. Runggu eme, arih-arikh guna kiniulin kegeluhen kalak si nterem. Runggu la ngukuri kerna dirina (si reh e saja) tapi kebutuhan kerina Moria i belang-belang doni enda. Amin utusenta ngenca si pulung i je tapi iwakilina kerina isi pusuhta. Emaka sitotoken ras si dukung dahin enda, gelah i bas runggu enda, asa ngasup ras gegeh dengen kepentaren i bas Dibata si mada Gereja banci ilakokenna.

☞ "Sibere Dibata tetap erkuasa ibas kerina arih-arikhta"

## Ersada Aarih Bagi Si Ersenina

Ogen: Pilipi 4:2-3

Kamis,  
18 Juni  
2020



**T**ema-nta wari enda eme sada toto ras arapen kerina persadan i doni enda. Jadi teman senina man ise pe, i je me nilai kemanusiaan, solidaritas ras kekelengen ipersada.

Senina secara pengertin, sada nande sada bapa, sada si mpetubuh ras mpebelin kita, seri hak ras tanggungjawab nandangi orangtua ras sangkep nggeluh. Bageme arusna amin i bas kinatana labo enda si pebelin.

I bas wari peduaken Mupel Moria GBKP kita Moria se-GBKP iajuk guna mpersada aarih, guna ngukuri kegeluhen ergereja ras ermasarakat bagepe Moria GBKP. Jadi pasu-pasu nandangi doni enda, guna sie me kita idilo ku bas persadan enda. Moria, sada ras sidebanna ersenina i bas Jesus Kristus, sabap IA me kap Tuhanta, si enggo leben ncidahkan kekelengenNa si mbelin man doni enda, atan kita i je ngalokenca. Bageme pedah Rasul Paulus man Eiodia ras Sintike, gelah tetap ersada aarih, enda isuratkenna nuriken maka dinamika kegeluhen i bas pelayanen erbagebage. Lit perjengilen, la si angkan ras sidebanna banci jadi. Tapi si inget kerina e la guna kepentingen diri jine tapi muat si mehuli guna dahin si mehuli. Perlu beda pendapat guna ndatken pendapat si terulin. La saja ia duana arus sada perarih tapi pe perpulungen iajuk ndukung pelayanen duana diberu enda i bas dahin mpembarken Berita Si Meriah. I bas ngerana kerna program ras dahin Moria se-GBKP perbedan pendapat ras sidebanna banci turah, perlu si inget si enda kerina guna kiniulin pelayanen Gereja. Terdauhen melala persadan nta pe organisasi sideban si arus jadi temanta ngukuri ras ndahiken dahin si mehuli, bangunlah kerja sama dinggen bangun jaringen.

☞ *"Ula kem, dahiken ras turiken"*

## Diberu-Diberu Si Ngelai

Ogen: Lukas 8:1-4

Jumat,  
19 Juni  
2020



**W**ari enda me wari petelukan kita ngikuti Musyawarah Pelayanan Moria GBKP si ihadiri kerina Pengurus Pusat Moria GBKP, Pengurus Moria Klasis bagepe Pengurus Moria i bas Runggun-runggun nari. I bas Musyawarah enda me BPP Moria mpertanggung jababken program ras pelayanenna sedekah sada periode eme 5 tahun. Janah i bas MUPEL enda ka pe ilakoken pemilihén Badan Pengurus Moria Pusat si 17 kalak guna ndahiken dahin Tuhan i bas periode berikutna. I bas MUPEL enda kerina diberu si ersidang, encakapken, ngerunggui, mpertanggung jawabken pendahin. Jadi kerina diberu si hadir e ngukurken uga ras kai si arus ilakoken guna dahin pelayanén ku wari si reh enda. I bas periodesasi si lit e i je me diberu nuduhkan pelayanenna sabap i bas nggit ngaloken dahin i je me situduhkan pelayanenta. Entah ise pe sinipilih kita i bas MUPEL enda berarti si milih ras si ipilih arus pe nuduhkan pelayanenna.

I bas masa pelayanén Jesus pe lit piga-piga diberu si ngelai si ndukung pelayanén Jesus i bas mberitakan Berita Si Meriah. Jesus niar-niar kuta guna er-berita ikut pe i je Maria Magdalena si enggo ipedarat Jesus 7 setan i bas ia nari bagepe ikut Johana ndehara Kusa, Susanna bagepe ras diberu sideban. Dahinta i bas Moria GBKP enda pe ngkuhi pelayanén Jesus, ngelai kerina Moria GBKP lit deba i wilayah Pusat, Klasis, Runggun bagepe Sektor. Kerina kita muat bagin i bas ngelai ikut pe ras enterem pendeta si diberu gundari la terjeng ngelai diberu tapi kerina perpulungen i bas tengah tengah gereja. Tetap muat bagin i bas ngelai amin labo isuratken doni enda gelarta tapi Dibata si nuratkenca.

☞ *"Buku kegeluhen nuratken gelar si muat bagin ngelai alu tutus"*

# Diberu Si Ersaksi

Ogen: Johanes 4:39-41

Sabtu,  
20 Juni  
2020



**W**ari pe-empatkan i bas Musyawarah Pelayanan Moria enda siarapkan kita banci erdalan alu mehuli janah terpilih Pengurus Moria GBKP si mbiar ras malang man Tuhan. Tutus i bas ndahiken dahin Tuhan seh maka banci min jadi saksi Kristus. I bas dahin pelayanan kerina diberu ngasup min jadi saksi Kristus i bas keluarga, Gereja bagepe pendahinna si tep-tep wari. Tentu perlu si bangun hubungan ras Tuhan adi ateta jadi saksi Kristus i bas kerina dampak kegeluhenta. Bagi diberu Samaria i bas renungenta sendah, pang ia erberita man kalak sideban i bas kutana anem gia itandaina bana diberu si gutul dingen melala perbulangenna. Tapi perjumpanna ras Jesus mereken kinipangen ersaksi kerna Jesus sabap enggo tangkas penandai Jesus kerna diberu enda. Arah perjumpaan ras Jesus maka ia pang ersaksi man anak kutana janah enterem anak kuta Samaria enda tek man Jesus arah kesaksin diberu enda.

I bas MUEPEL enda enterem Moria GBKP banci jumpa ras ersidang, sibahanlah enda jadi inganta arih-araih ras sisaksiken Jesus si enggo itandai kita e eme Dibata si erbahansa kita pang naksiken kuasa ras kemuliaNa. Persidangan enda la terjeng ingan ta jumpa ras ertedeh ate tapi bahanlah maka enda jadi kesaksinta maka arah kiniersadan arihta banci situduhkan kualitas kinitekenta subuk i bas jabunta, pendahin bagepe pelayanenta i bas Gereja. Tetaplah kita ngelakoken si mehuli ras ula kal situduhkan kesaksin si erbahansa lanai kalak mesikel reh jumpa ras Jesus.

☞ *“Saksiken keleng ate Dibata tep-tep wari”*

## Dahikenlah Alu Tutus

Ogen: Kolose 3:23

Minggu,  
21 Juni  
2020



**P**aulus erkai pe la tanggung-tanggung. Sanga lenga nandai Jesus jadi Juru Selamatna maka la tanggung-tanggung ia guna mbela kinitekenna i bas agama

Jahudi. Kekristenen enda ndube iakapna sada aliren sesat i bas agama Jahudi. Erdandanken si e maka la ia tanggung-tanggung guna nangkapi ras niksa kalak si tek man Jesus. Enda ilakokenna erkiteken bage kin kinteken ras pengangkanna tupung sie (bdk Gal. 1:14). Kenca ia enggo nandai Jesus maka ia jadi sekalak Rasul si la tanggung-tanggung. Ia me rasul situtusna ndahiken dahin meritaken Berita Si Meriah (2 Kor.11:23). Si e ilakokenna erkiteken kinitekenna man Jesus Kristus.

Perbahanen rehna arah palas kiniteken. Emaka bagi perkinitekenna nge perkadena pe. Ertina adi mejile kinitekenna maka perbahanenna pe mejile. Enda me si idah arah kegeluhen Paulus. Emaka pedahna man suruh-suruhan (budak) si enggo Kristen i Perpulungen Kolose nina, "*Kai pe si ibahanndu, dahikenlah e alu tutus, tempa-tempa kam erdahin guna Tuhan, labo guna manusia.*" Kata tutus i jenda i bas cakap Indonesia eme "dengan segenap hati." Enda ertina la tanggung-tanggung. Engkai maka kita erdahin la tanggung-tanggung? Sabap nina Paulus kita erdahin bagi man Tuhan. Kata "tempa-tempa" cakap Indonesia eme "seperti." Ertina maka kai pe pendahinta situhuna eme pelayanenta man Tuhan. Erdandanken si e maka adi kin kita tek man Jesus maka cidahken dage kinitekenta e arah pendahinta. Kai pe pendahinta ula tanggung-tanggung tandana kinitekenta pe la tanggung-tanggung.

🕊️ "*Bagi perkinitekenna nge perkadena pe*"

## Tuhan Merekan Rejeki

Ogen: Masmur 127:1-2

Senin,  
22 Juni  
2020



Salomo raja termurmur. Istana pe seh kal jilena ras ulina. Emaka tersinget me maka ratu Selatan nari (sekitar India) reh ku Jerusalem nengen uga termurmurnya ia. Tentera si njagai ia pe tentu enterem ras paguh. Aman dengen terkawal situhuna geluhna arah perkiran kegeluhen manusia. Tapi ia me si nuratken Masmur 127 enda nina, "*Adi rumah la bekas TUHAN mantekisa, sia-sia me pendahin tukang. Adi kuta la ikawali TUHAN, sia-sia me pengawal erjaga-jaga.*" Kepeken kalak si erkiniteken ngeteh keterbatasan kai pe si lit i bas ia. Sadar kal Salomo maka kuga amanna pe rumah secara bangunen, lit si la terjagaisa eme keamananen i bas pusuh. Emaka bangunen si mejile dengen paguh radu ras tentara si erjaga la jaminen aman ras dame man kalak si ngianisa.

Jenari ngerana ia soal rejeki. Nina, "*Percuma kap encari alu latih erdahin, lampas medak dengen melawen tunduh. Sabap TUHAN merekane rejeki man kalak si ikelengiNa, tupung si ikeliniNa sangana tunduh.*" Enda labo soal latih erdahin tapi soal ernalem man Tuhan entah lang. Pustaka Si Badia ngajari kita tutus erdahin ras curcur panas. Tapi e pe labo lit ertina adi la erkemalangen man Tuhan. Sabap Dibata merekenca man kalak si ikelengiNa paksa tunduh. Tunduh ertina la kita erban kai. E ertina maka situhuna erdahin e nggo biak manusia si itepa ku doni enda. Tapi soal rejeki (eme keperlunta teptep wari) Dibata nge ngaturkenca. Emaka si penting dahiken alu tutus, inget ka istirahat ras keluarga, bage pe ula lupa ngenanamisa sabap Tuhan nge ngaturken rejekinta sekalak-sekalak.

☞ "*Erdahin alu tutus tapi ula lupa ngadi ras keluarga*"

## Erdahin Tentu Ngalo Me Kam

Ogen: 2 Tesalonika 3:10-12

Selasa,  
23 Juni  
2020



**E**tos kerja perlu ilakoken i bas erdahin. Gelah arah dahin si idahiken kita kalak si debanna pe termotivasi guna erdahin alu tutus. Alu kata si deban, palasta erdahin eme

erkiteken Dibata si sembah kita pe erdahin, e maka kita pe erdahin alu tutus.

Samuel H. Tirtamiharja nuliskan maka lit piga-piga unsur si penting si arus lit i bas dirinta guna erdahin alu mehuli dengen ndatken ulihna pendahinta e. Unsur-unsur e me : 5% kininggiten guna erdahin ras ncibalken dirinta; 10% kengasupen ras penampilen; 70% sikap ntah orat geluhta si mehuli. Sikap ntah orat nggeluh mbelin ngaruhna i bas ndahiken dahinta. Adi perkisat labo rulihkan si payo; tapi adi mejingkat ndahiken dahin, ulih si ialoken banci bagi siniarapken kita. Si enda ningetken maka sikap ntah orat nggeluh e seh kal perluna. Bicara kuga gia hebatna pemeteha, beluh pe kita ncibalken diri, lit ka pe gegeh kengasupenta bage pe metunggung ka gia penampilenta tapi orat geluhta la mehuli tentu labo maba kiniulin man banta bage pe man kalak si deban.

"Kalak si la nggit erdahin ola bere man." Kalimat si tersurat i bas 2 Tesalonika 3:10, ngataken maka si erdahin nge si man beren man dengen si erdahin nge perlu ndatken upah. Kalak perkisat la lit inganna dengen nembah ate Dibata, erkiteken Dibata si sembah kita e pe Dibata si erdahin. Erdahin tentu ngalo me. Kalak si erdahin dengen ngendesken dahinna e man Dibata, tentu i pasu-pasu Dibata. Melala kal dahin-dahin si mehuli, erguna banci sidahiken, ukuri ras gargarilah e. Janah la ka sitik dahin si melket si arus sisilahi. Emaka dahiken dahin alu tutus, tentu si aloken me pasu-pasu si rehna i bas Dibata.

*“Erdahinlah alu tutus, ipasu-pasu Dibata me geluhndu.”*

# Engkelengi Senina

Ogen: 1 Johanes 4:19-21

Rabu,  
24 Juni  
2020



**K**ita engkelengi sabap leben Tuhan engkelengi. Kalimat enda mpersingeti kita gelah makeken kegeluhenta guna icidahken ras nehken kekelengen nandangi temanta manusia. Keleng ate Dibata man banta la pernah erbatasen. Keleng ateNa icidahkenNa alu mereken anakNa si tonggal gelahna kita anak-anakNa ndatken keterkelinen. Kekelengen Dibata nandangi kegeluhen manusia tentu jadi dalanta ka lako engkelengi temanta manusia. Dibata nehken kekelengenNa labo perban metunggungna kita ngalokenca tapi perban Dibata Bapa si sembah kita e, eme Dibata si dem alu ate keleng dingen perkuah. Karakter Dibata enda me jadi asamta lako nehken kekelengen nandangi seninata.

*"Adi lit kalak si ngatakenca maka keleng atena Dibata, tapi nembah atena man seninana, kalak si bage perguak. Sabap kalak si la engkelengi seninana si idahna, labo tuhu ia engkelengi Dibata si la idahna."* Perkatan Tuhan enda alu tangkas ningetken man banta, maka keleng ate er-Dibata teridah arah keleng ate ersenina. Keleng ate ersenina banci icidahken arah erbage-bage cara, umpamana: tupung seninanta i bas perbeben si mberat si sikapken dirinta lako inganna nuriken perbebenna, tupung seninanta i bas keriahen hadir kita jadi teman si mpehagaken ia i bas keriahenna, tupung seninanta i bas iluh mambur si bahan waktunta nemani ia lako ngelewati aru atena, tupung seninanta ersalah, nggit kita mpersingeti salah lepakna gelah jera. Melala banci silakoken i bas nehken keleng ateta ersenina. Keleng ate er-Dibata teridah arah keleng ateta ersenina.

☞ *"Engkelengi Dibata icidahken arah kita engkelengi Senina"*

## Gule-Gulen Ras Lau Meciho

Ogen: Daniel 1: 10-13

Kamis,  
25 Juni  
2020



**N**asruddin sangana kundul i lebe-lebe rumahna janahna ia mangani cina cur, la ngadi-ngadi cina cur ndai iketepina sada-sada. Nungkun kalak si mentas, "engkai maka panganindu cina cur ena bage kal buena?". Jababna "ndarami cina si ntebu ateku". Menurutndu lit nge cina ntebu? Bage me kita rusur, si entebu ras si ntabeh rusur si darami. Emaka labo mamang ateta, gundari e melala kalak kena diabetes perbahan gaya hidupna, si ernanam atena rusur inemenna. Kena hipertensi ras kolesterol, perbahan daging ras lemak putihna ateta rusur si pan. Asam lambung, asam urat em pinakit si mbue gundari i sekelewetta. Perlu kal kita metenget panganta ras daging kulanta.

Salah sada kunci kesehaten Daniel, Hanaya, Misael ras Azarya kepeken labo pangan ntabeh si rusur pan raja. Menu meja raja biasana daging, anggur si ntebu ras erbage-bage pangan si isiapken pegawaina eme menu-menu spesial. Tapi kalak enda gule-gulen ras lau meciho ngenca inemna. Amin bage pe sehaten ras pentaren kalak enda. Kepeken si sedap bas babah langa tentu jore ku beltek, tapi si la sedapsa bas babah banci jadi tambar si erguna man kula. Emaka ulalah babahta si penggurui. Mari si usih Daniel ras teman-temanna. Gulen ras lau meciho e nggo itepa Dibata jadi pangan ras tambar man manusia.

Sekalak artis Kristen ngikuti Puasa Daniel eme man gulen-gulen ras lau meciho saja dekahna 21 wari, bas dungna ia erpuasa e sehat kal ia. Kata Tuhan la pernah bual. Adi rusur la jore beltekndu, cubaken man gule-gulen saja ras silahi teh manis, kopi ras inemen ntebu cukup lau meciho, nanami ulihna.

☞ "Ula babah penggurui"

# Erteman Alu Payo

Ogen: 1 Samuel 20: 1-10

Jumat,  
26 Juni  
2020

ИОНАФАН И ДАВИД



**M**elala teman. Tapi enggo me pepayondu maka pertemanenndu e sehat? Sekalag psikolog ngatakenca maka pertemanen si sehat ciri-cirina lit

kepercayaan, si hamaten ras radu tambah kiniulin man bana pekepar sada ras sidebanna. Kepercayaan ertina tek kita bana, ia pe terteki akapna kita. Sihamaten ertina si ergaken ia ras biakna la si hakimi tapi si aloken ia uga litna.

Contoh pertemanen si terkenal bas Pustaka Si Badia eme Daud ras Jonatan. Amin gia Saul bapa Jonatan jahat man Daud tapi Daud tetap tek man Jonatan ras mehamat man bana. Jonatan pe bage ka. I bas litna perkara Daud ras Saul, Jonatan jadi penengah. Komunikasi Daud ras Jonatan sikap. I bas Daud nuri-nuri kerna kecibalna Jonatan jadi si megimegi si mehuli, iturihina pusuh temanna, labo ipegaraina. Emaka kenca Jonatan mate, Daud lalap nginget ia ras kesusurena.

Pertemanen e penting. Kita la banci nggeluh si sada. Alu litna teman e mpekeke keriahen ukurta, lit temanta erbagi suka ras duka. Tapi pertemanen e arus si jaga. Carana eme ula banta ngenca si ukurken, ula nggit erbual man teman, nakiti secara fisik ras kata-kata. Kita pe arus megermet nandangi ise si jadi temanta. Adi babaina kita rukur negative, ndarami kekurangan kalak, cekurak ras jadi kalak malas. E ertina labo payo teman e. Teman si mehuli babaina kita erkiniteken, reh ulina ras reh ergunana. Silahkan pertemanen si la payo, sabap pertemanen si la payo ncedai biak si mehuli. Daramilah teman si biakna rukur positip ras mbangun dirinta gelah lit ulihna pertemanenta e man banta bage pe man kalak sideban.

☞ "Jesus teman si tuhu-tuhu"

# Tengguli Wani

Ogen: Kuan-kuanen 24:13-14

Sabtu,  
27 Juni  
2020



Tahun 2017, Badan kesehatan dunia WHO mpetebetehken maka 1 dari 10 obat di negara berkembang dinyatakan palsu. Kinata enda nuduhkan man banta maka melala kepeken produk-produk kesehatan palsu si lit i sekitarta. Piga-piga waktu si lewat melala produk-produk kecantiken si ilarang guna ipake erkiteken mengandung merkuri si banci mpeturah pinakit kanker. Kerina pemalsun enda tujunna gelah melala dat untung, gelah pedas dat sen.

Emaka i bas jamanta genduari enda perlu kal kita berhikmat, pentar, bijaksana i bas milih produk si pake kita bagepe pangan si ipan kita. Enda me pentingna kepentaren si isingetken Kitab Kuan-kuanen man banta. Kepentaren e penting janah rehna i bas Dibata nari. Desken tengguli wani si mehuli, bage me kepentaren e seh kal perluna guna banci terang wari-wari kegeluhenta. Terang wari-wari kegeluhen banci itafsirken, kegeluhen ras masa depan si teneng, aman, ndauh i bas bahaya nari. Tengguli wani e entebu nanamna, melala gunana ku bas daging kula, nambari pinakit ras mereken daya tahan tubuh. Seh perluna adi tengguli wani enda iinem tep-tep wari. Kepentaren desken tengguli wani si maba kesehatan kula ras pertendinta.

Kalak pentar la murah tek nandangi informasi-informasi si lenga terbukti kebenarena. Melala kal cara gelah banci kita metenget, kususna i bas kesehatenta genduari enda. Banci si nen, si pelajari arah google, media sosial kai manfaat dengen efek samping sada-sada produk. Ula ipengaruhi erga diskon, erga murah, buatan luar negeri, ras sidebanna tapi pepayo dengen si ukuri manjar-ajar gelah ula salah.

☞ *“Lakoken Kata Dibata tiap wari”*

# Ajarkenlah

Ogen: Ulangen 6:1-9

Minggu,  
28 Juni  
2020



**D**i kune lit anak-anak kitik mbaru beluh ngerana, kira-kira kai kata ntaah kalimat pemena si iajarken man anak e? I bas tradisi kalak Jahudi kata ntaah kalimat pemena si iajarken man anak si mbaru beluh ngerana eme Ulangen 6:1-9 enda ntaahpe igelari *Syema Israel*. Enda me pengakun kiniteken si ibelasken setiap kalak Jahudi seh asa genduari. Ulangen 6:1-9 enda eme pidato pengajaren Musa man bangsa Israel. Pidato enda desken sada mata pelajaran si arus ibegiken, iinget, dengen ilakoken bangsa Israel ras kerina kesusurena. Inti pidato enda, eme maka setiap kalak Israel arus nembah Dibata si sada, asa ukur, tendi ras gegeh. Lit telu cara pengajaren si isingetken Musa i jenda. *Pemena*, eme persingeti rusur, ertina lalap iulang-ulang. *Peduaaken ras peteluken* eme alu ngelakoken perbahanen si tep-tep wari, eme iiketken i bas pergelangen tan, pake bas perdempaken, bagepe suratken i bas binangun pintun rumah ras gerbang. I bas tradisi Ibrani enda igelari *tefilim* ras *mezuzah*. Jenari ise si erlajar ras ngajarkenca? Kerina bangsa Israel! Subuk metua ras nguda kerina perlu erlajar janah ngajarkenca man anak-anakna, ija pa pe, katawari pe, ertina setiap kesempatan banci jadi waktu guna erlajar ras ngajarken. I bas minggu pendidikan enda ibabai kita guna tetap terbuka i bas erlajar segedang geluhta. La terjeng anak-anak, tapi kita kerina pe arus tetap erlajar. Erlajar arah Pustaka, ngoge buku, internet, pengalamen, bagepe kegeluhen kalak si deban. Enda perlu kal i bas kegeluhenta, sabap kalak si la nggit erlajar, eme kalak si la nutup kemajun i bas geluhna.

“Kata Dibata ula ngadi bas kam”

# Ersenang-senanglah

Ogen: Kejadin 21: 9

Senin,  
29 Juni  
2020



ibas piga-piga bulan si lewat keadan tuhu ncekam, virus covid 19 entah pe corona jadi bas tengah-tengah masyarakat se-doni enda. Melala ibahan usaha subuk arah pertoton terus la erngadi-ngadi man Tuhan, kebaktin ibahan i rumah-rumah. Bagepe i bas usaha njaga kesehaten, make *masker*, cuci tan, make *hand sanitiser* semprot. Anak-anak sekolah, kuliah pe i rumahken lebe sementara alu tugas-tugas mandiri si ibereken guruna, gelah pemutusan virus covid 19 e jadi, segelah enggo banci situasi negaranta terlepas i bas virus enda ndai. Gundari enggo seh waktuna Liburan Sekolah, kejenuhen anak-anak i bas rumah saja sedekah enda nggo banci igantiken alu bebasna ia ku ingan-ingan wisata ras orangtua. *Kebersaman di luar rumah*. Sedekah enda kebersamanta (orangtua ras anak) i rumah tuhu-tuhu erbuahken kiniersadan arih, erbuahken kekompaken, erbuahken kiniteken jabu reh meningkatna. Nandangi anak-anak, em keriahen. Banci ermain-main, ersenang-senang, ku jah ku je ras teman-teman bage pe ras orangtua.

Bage me pe i bas oratenta, sada paksa Ismael anak Abraham si ipupus Hagar main-main ras Isak anak Abraham arah Sara. Bagi teman sebaya entah pe bagi dua anak-anak si banci sepermainen, tentunya jadi keriahen man Ismael ras Isak asum sie. Sabap i bas perukuren anak-anak labo ndauh nangkelsea ise dirina, ise ka temanna ermain-main e. Jadi, i bas paksa enda uga dage kita orangtua mereken keriahen man anak-anakta? Kuja dage ia banci si baba ersenang-senang? Mungkin sebagian i bas kita orangtua ngukuri sibukna pendahinta, ngukuri kerna biaya adina kita ku jah – ku je si perlu mbue materi, waktu ras persiapen. Ula egois. Sabap, si idahiken kita e pe ulihna guna anak-anakta. Buktikenlah!!

☞ "Nanami ras isi jabunta keriahen, ulihna malem ate"

# Kebayaken Labo Gelgel

Ogen: Kuan-Kuanen 27: 23-27

Selasa,  
30 Juni  
2020



**K**ai si lit i bas kita i bas sengkemirep mata banci bene. Kai si lit i bas kita labo lit si asa lalap umurna. Si e kerina jadi gelah tetap terpuji Dibata simada kerinana si

lit i bas doni enda. Salomo sekalak si pentar, mereken pengajaren i bas Kitab Kuan-kuanen enda:

1. Piaralah asuh-asuhenndu alu mehuli. Adi seh paksana kai pe lanai lit man tukuren, maka asuh-asuhen si mereken ulih banci ipake tuanna guna keperluan kegeluhenna.
2. Kebayaken labo gel-gel, bangsa pe labo tahan rasa lalap. Banci hal-hal si la isangka kita mahanca kebayaken e terdaya sada-sadai. Bagi jelma pe Labo ertahan rasa lalap, lit tutup usiana.
3. Lit pergantinna si lit genduari enda (sinuan ras rubia). Tahun ku tahun melala perubahen si jadi i bas sinuan bagepe rubia e. Si nai lit genduari lanai lit, si genduari enda tempa-tempa gambaren kitikna si nai. Bagi bunglon misalna eme kitikna dinosourus si nai, melala pe contoh-contoh sidebanna.
4. Makeken ulih alu mehuli. Kai si lit genduari enda, banci min alu pentar kita makekenca gelah tepat guna. Adi Lang, banci kita erkadiola dungna.

Perenungenta i bas paksa enda eme "enggo dage sipakeken alu mehuli kiniliten si ibereken Dibata man banta?" Erdahin kita alu tutus, payo gelah banci sipakeken. Ipakeken guna dirinta jine entah man kalak si deban si perlu pe? Simehulina, adina enggo si eteh maka kebayaken e pe labo gelgel, paksana lit e banci min kita berbagi ras kalak si perlu, alu bage lit gunana kebayakenta e.

☞ "Si lit i bas kita, pakeken guna kiniulin"

# Pilihlah Kegeluhan

Ogen: Jeremia 21:1-10

Rabu,  
01 Juli  
2020



**S**elaku nande entahpe orangtua tentu ersura-sura gelah anakta jadi anak si patuh entahpe nggit megiken katanta. Amin bage gia, i bas kinatana, lit ka nge anakta enda la megiken kata,

si erbahanca kita merawa man bana. I bas kita merawa e, mawen si bereken ka ukumen man bana. Tujun kita mereken ukumen e labo erkiteken la ateta keleng, tapi situhuna jadi dalam mereken pilihan man bana. Adi ilakoken si la mehuli, ukumen ras ulih si la mehuli ialokenna, tapi adi patuh idatkenna ka si mehuli. Arah pilihan enda, kita rusaha guna ndisiplinken anakta.

Pendisiplinen enda pe ilakoken Dibata man bangsa Juda ras man rajana Sedekia. I bas situasi bangsa e ikepung bangsa Babil, Dibata ngerana maka enda jadi erkiteken peratenNa. Merawa Dibata erkiteken kelapatuhen bangsa e. I bas ukumenNa tetap denga iberekenNa pilihan man bangsa e, lit pilihan si maba ku kematen bagepe pilihan si erbahanca terkelin man bangsa e, aminna pe arus itaban ia ku Babil. Dibata mereken kesempatan guna milih, janah sura-suraNa gelah ipilih bangsa e dalam kegeluhen eme nggit erpengendes ras patuh man Dibata. Sabap Dibata e ulu kegeluhen si tuhu-tuhu. Bage ka me i bas kegeluhenta selaku anak-anak Dibata. Melala pilihan-pilihan si man pilihan i bas kegeluhen jabu, pendahin entahpe ekonomi, bagepe i bas ngajarken anak-anak. Mawen mesera kal si akap i bas milih, tapi bagi si ajarken renungenta i bas wari enda, si pilihlah dalam si ngena ate Dibata, eme kita nggit erpengendes ras patuh man baNa, la si pebelin sura-suranta, segelah iberekenNa kegeluhen man banta.

☞ "Emaḡa Pilihlah kegeluhen, maḡa ḡam ras ḡesusurenndu nggeluh"

## Ndengkehken Kata Tuhan

Ogen: Jeremia 21:11-14

Kamis,  
02 Juli  
2020



Lit sada jabu rubat kenca ercakup-cakap ia sedekah 15 menit. Perubaten enda jadi erkiteken i bas ia ercakup-cakap e perbapan ngue-ngue saja, tapi adi isungkun ndeharana ndai kai si uekenna, sitik pe la itehna. Kedungenna merawa ndeharana ndai ras terjadi me perjengilen. Kejadin enda mungkin saja rusur jadi i bas jabu-jabunta.

Kai nge si akap si erbahanca maka megati turah perubaten ras temanta ngerana? Rusur kel erkiteken la si dengkehken Ia ngerana, entahpe mungkin ia la ndengkehken kita. Tentu si angka bedana ndengkeh-ndengkeh ras ndengkehken. Adi ndengkeh-ndengkeh banci silakoken janah mentas entahpe erdalan, tapi adi ndengkehken, perlu kita mediate ras mereken ukur bagepe pusuhta nandangi kata si ipesehna e. Emaka siangka kai si katakenna.

Enda me si ituriken Kata Dibata enda, isuruhna bangsa Juda bagepe kita ndengkehken Kata Tuhan. Adi la sidengkehken kataNa banci lit ukumen si aloken i bas kegeluhenta. Kata Tuhan si kuga nge si perlu sidengkehken? Gelahna kita jera i bas perbahanen-perbahanen si la payo, si la ngena ate Dibata. Adi sidengkehken Kata Dibata e, tentu si angka kai tujun Dibata man banta, eme erkiteken keleng ate Dibata man banta, jadi labo erkiteken mbiar kita .

I bas kegeluhenta mbue kal kesempatan ras fasilitas si ibereken Dibata guna kita megiken Kata Dibata. Terlebih-lebih i bas era teknologi enda, emaka si pakeken kesempatan bagepe fasilitas enda alu mehuli, segelah kegeluhenta pe ipelambaruiNa ras tetap dame geluhta. Ndengkehken Kata Dibata sekaligus kita ngasup ngelakokensa jadi pergegeh bas geluhta.

☞ *KataNidu kap terang man nahengku* ☞

# Runtuh Adi La Patuh

Ogen: Jeremia 22: 1-9

Jumat,  
03 Juli  
2020



I baratna sada bangunen si ate ipajekken tapi la ngikuti ketentun (aturen). Emaka bicara enggo idahiken pe tapi labo banci tahan ndekah dingan paguh.

Sabap enggo lit i je si la payo idalanken guna majekken bangunen e. Angin meter, udan meder banci mahanca bangunen e la sikap, apai ka reh ka tantangan si terbelinen bencana alam ras banjir, sontar pe banci bangunen e. Kinitekenta enda pe ibarat sada bangunen. Paguh adina Dibata jadi palasna. Ibangun pe tetap i bas kiniersadan si paguh man Dibata, ipekena-kena alu kepatuhen man Dibata. Perbahanen si mehuli, kedamen, keadilan jadi buah kiniteken.

Bangsa Israel si igelari bangsa Dibata tapi bangsa si rusur la patuh man Dibata. Man bana rusur ipepilihken: adi tuhu-tuhu ikutkenndu bagi si Kukataken enda kesusuren Daud tetap ngerajai negeri enda. Radu ras pegawai-pegawaina, rayatna tetap banci mentasi pintu gerbang istana alu gereta kuda ras ngersak kuda (ay.4). Tapi, adi la ikutkendu kai si Kuperentahken ersumpah Aku man bandu maka runtuh me istana enda. Aku kap Tuhan si melasken Kata enda (ay. 5). Adi enggo Dibata bage ngerana, maka bangsaNa tading milih tetap megegeh dingan kesusurenna ipasu-pasu Tuhan entahsa jadi bangsa si bene.

Mulai medak erpagi-pagi sedar entah la sedar kita iperhadapkan ku bas pilihan. Pilihan si mahanca tetap kita sikap dingan paguh kinitekenta entahsa pilihan si banci mabaisa kita bene. I bas kiniteken marilah, pilih megiken dingan patuh kempak Dibata segelaha kegeluhenta tetap ipasu-pasu dingan megegeh ibahan Kuasa Tuhan.

☞ *"Paguhlah bahan palasta"*

# Tangisilah Dosa-dosandu

Ogen: Jeremia 22: 10-12

Sabtu,  
04 Juli  
2020



**K**ata Jeremia kerna Joas anak Raja Josia si nggancihken ia guna merentah Juda, nina: "enggo ibaba kalak lawes lanai pernah mulih, lanai pernah idahna negeri inganna

tubuh ndube."

Kesempatan i tengah-tengah kegeluhenta enda ibereken Dibata eme guna tetap ngukuri dengen ndalanken bagi si ngena ateNa. Tangis perbahan kesalahen ras dosa-dosa si lewat ertina kita erkadiola. Tapi, lanai bo e sipedekah-dekah. Uga kinatana genduari enda? Adi lit denga si erbanca kita erkadiola, enda me si man pekenan. Banci saja turah penggejapen erkadiola tapi lanai lit kesempatan mpekenasa. Tangisilah dosa-dosandu! Enda ngajuk kita nggejapken dengen ngakuken ise kita i lebe-lebe Dibata. Kita manusia si dem alu dosa ras kelepaken. Kegeluhen ta manusia i bas doni enda sada pe lenga bo lit si serta. I jah i jenda lit denga kekurangenna, lit denga si lenga bo pas si idalanken kita, sieteh e labo payo tapi ban labo teridah ku jelma si deban/jelma si enterem lalap denga iusur-usur. Ngadiken! Gundari waktuna kita tangis erkadiola ibahan dosa-dosa ras kelepakenta si idalanken kita. Gundari masana mulihken kempak Tuhan. Mari secara pribadi kita ngakukenca i bas pusuhta sekalak-sekalak, banci pe isuratken kita:

- 1.
- 2.
- 3.
- 4.

Asum si inget dosa-dosanta, emaka si dungi alu pertoton mindo pengalami i bas Dibata nari.

☞ *"Jeralah, pesikap perukuren ras perbahanenta"*



**K**initeken kalak Israel sifatna demokratis. Sekalak raja arus mperdiateken kegeluhen rakyat dingnen mehamat man bana. Raja arus jadi usihen subuk i bas erkiniteken

bage pe i bas perdalanen kegeluhen. Tapi raja Joyakim la bage. Ia sekalak raja si meganjang rukur, la cocok jadi pemimpin. Ia ia puas kundul bas Istana Raja i Jerusalem, kurang mehaga denga akapna bana, emaka ipajekkenna istana-istana si mbaru, alu make duit kerajan si arusna e guna kesejahteraan rakyat. Tole nari perbahanenna si la terpuji eme ipaksana rakyat mbangun istana e alu la nggalar, la iberekenna upahna, bali ras kerja paksa. Keputusan-keputusan si ibahanna guna kepentingenna saja, sitik pe la adil man rakyatna.

Ibandingkan Jeremia perbahanen Joyakim e ras perbahanen bapana Josia tupung ia jadi raja Israel. Raja Josia kalak bujur, iperdiatekenna Kata Tuhan, irungguina rakyatna alu bujur, iperdiatekenna rakyatna si musil-musil, janah isampatina gelah tetap ngasup ndalani kegeluhen. Ndauh kal biak bapana e bas Joyakim nari seh maka inubuatken nabi Jeremia, raja si la bujur pagin ibenterken i Jerusalem nari, kematenna pagi la lit si nangisisa. La lit kalak erceda ate kerna kematenna, la lit kalak si ngatakensa 'andiko teman, andiko raja.' Itanemken ia bali ras nanemken kelede isaren jenari ibenterken arah pintu gerbang Jerusalem. Biasana nubuat nabi Tuhan la pernah la tersehi sabap kai si ibelaskenna rehna bas Tuhan nari. Arah kata enda ibabai kita lako tetap mperdiateken kata Tuhan si mereken kemalemen ate dingnen kegeluhen si rasa lalap.

☞ *"Penandai si payo erbahan kita patuh"*

# Ukumenna La Tersilahi

Ogen: Jeremia 22:20-30

Senin,  
06 Juli  
2020



**K**enca Joyakim mate, anakna Joyakin nggantiken ia jadi raja Juda. Man bana pe ipeseh Nabi Jeremia kerna perkatan Tuhan. Joyakim e iandingken cincin stempel i bas tan kemuhen Tuhan, si

jadi tanda hak milik, biasana ibahan arah emas ras batu permata. Ngatakensa maka bangsa Juda e sikerajangen Dibata. Amin bage gia ieldek (ilepasken) Tuhan bas jari-jarina nari. Emaka iendeskenna man kalak si ersura-sura munuh Joyakin eme Nebukadnezer. Raja Joyakin lanai pagi pernah mulih ku Juda. Sekalak pe i bas kesusurena lanai pernah jadi raja Juda. Kerina pagi mate i taneh Babilon.

Kai si inubuatken nabi Jeremia enda jadi kerina. Raja Joyakin iendesken man Nebukadnezer. Situasi bangsa Israel desken anak-anak si la erpengarapen, bangsa-bangsa si pernah jadi sekutuna kerina enggo iradasken. Emaka labo sada pe si ngasup nampati Israel. Desken kudin taneh si ndabuh pecah, perper lanai terpake ras la lit si mpepulungsa bageme kecibal bangsa e erkiteken kinilapatuhenna man Tuhan. Ukumen si enggo ibelasken Tuhan la tersilahi. Adi si perdiatken sinursur Joyakim, Joyakin seh kesusurena, lanai sada pe ipake Tuhan jadi raja i Juda. Orang tua si rulah anak pe ikut maba suina, bageme adi Dibata si enggo erbelas.

Jadi pelajaran man banta, adi perbahanenta la payo, la patuh man perkatan Tuhan, ngikuti pe anak-anakta. Sabap labo lit si man usihen bas kita nari. Dibata ngukum kalak si la patuh ndalanken perkatanNa, ras ukumen e seh man anak kempu si la patuh. Ukumen bas Dibata nari ise pe la ngasup ngolangisa, amin ertoto kerina nabi-nabiNa, tetap labo mobah ukurNa.

☞ "Babai anak kempu erkemalangen man Tuhan"

## Pemimpin Si Mpermakani

Ogen: Jeremia 23: 1-4

Selasa,  
07 Juli  
2020



**K**ai kin tugas sekalak pemimpin? Tentuna maba kalak si ipimpinna seh ku bas tujun si ni tujuna. Adi la terbabaina si ipimpinna e subuk alu usihen, kata persinget, kebujuren,

keadilan ras kebenaran tentuna ia labo sekalak pemimpin. Ia kalak si ngukuri dirina saja ngenca. Man sekalak pemimpin ibereken hak ras tanggungjawab, dikune la ilakokenna tanggungjawabna e pasti man bana ipindo pertanggungjabapen. Emaka adi la payo pendalankenna iukum me ia. Sabap pemimpin si isingetken i jenda eme pemimpin si mpermakani. Adi ikataken mpermakani, mere man kerina biri-birina seh besur, la lit sada pe si kelsehen, ijagina arah ancamen rubia-rubia si merawa janah seh mulih ku karangna la lit kekurangan. Dikune luka ntaah sakit rubia-rubia e, ipekena-kenana seh maka malem.

Tapi kepeken si ibahan pemimpin-pemimpin Israel labo bage, ihuntakkenna biri-biri e seh kerap marpar dengen ipelawesna. Emaka ertaktak me Dibata ras pemimpin si bage rupana, ibereken Dibata dahin mpermakani e man permakan si deban, janah ipasu-pasuna me bangsa e dem alu ketuahmen. Bage kepe rawana Dibata man pemimpin si la ndahiken dahinna alu mehuli. Labo iidoi Dibata bangsa e tapi pemimpin-pemimpinna me si iukum Dibata. Kita kerina enggo ipilih Dibata jadi si mpermakani, i bas jabu mpermakani anak jabunta, i bas perpulungen teman perpulungen bage pe i tengah masyarakat. Marilah si dahiken tanggungjababta bagi si ibere Dibata. Metengetlah, ula kal sempat kita iukum erkiteken la payo pendalankenta tanggungjawab si ibere Dibata man banta. Iabai si mpermakani kita ku lau si teneng permalerna, si meratah mbal-mbalna. Pastiken mejuah-juah geluhta.

✎ *"Jadilah permakan si mehuli"*

# Raja Si Bujur

Ogen: Jeremia 23:5-8

Rabu,  
08 Juli  
2020



**M**esera kal ndarami kalak si bujur i bas doni enda. Amin lit, megati talu iban si la bujur, terbuni ia, sabap beliganna sitiken asa si la bujur ndai. Amin bage pe, tetap nge kalak

nimai, ndarami si bujur ndai. Ngerana kerna si bujur enda, mbelin hubungenna ras kerina dampar kegeluhen. I bas kai pe perlu kal kita kalak bujur, apai ka sekalak pemimpin. Bujur pe pemimpinna banci saja anggota ntah kalak si ipimpinna e la bujur apai ka dikune pemimpinna epe kin la bujur.

Man bangsa Israel, ipadanken Dibata sekalak raja si bujur. Raja si nggantiken pemimpin-pemimpin si la mpermakani bangsa e alu mehuli. Pemimpin i bas kesusuren Daud nari, janah di kune ia jadi raja maka terkelin me kalak Juda. Tangkas, ijamin Dibata arah pemimpin si bujur e banci mabai bangsana nggeluh alu mehuli. Alu bage banci si ertiken, maka kegeluhen bangsa e mbelin itentukan ise si mimpin ia.

Tentuna enda pe tangkas i bas kegeluhen bangsa-bangsa i bas doni enda genduari. La sitik, bangsa si pecah, perang, la dame erkiteken pemimpinna la bujur. Pemimpinna ngukuri diri ntah kelompokna saja, mpebayak bana, la erkemalangen man Tuhan. Perlu kal kita sekalak pemimpin si bujur. Janah enda ipadanken Dibata man kalak Israel i bas jaman nabi Jeremia. Janah jelas kal enda nubuatan kerna Jesus Kristus si ipadanken Dibata.

Perayaken ras arapen si bagenda tetap si totoken dingeni si perjuangken i bas kegeluhen bangsa ras negaranta i bas jaman enda. Emaka dikune lit kesempatan man banta guna milih pemimpin, daramilah kalak bujur.

☞ *"Si bujur tetap iarakken, mari si sehilahi i bas dirinta"*



**D**ibata nepa manusia tudu ras tempasNa. Selaku tinepa si itepa alu mehuli dengen tudu ras tempas Dibata, tugas ras tanggung jawab manusia e eme nehken si mehuli dengen kekelengen. Asam manusia eme gegeh si ibereken Dibata man manusia i tengah-tengah kegeluhenna. Tapi kenca manusia ndabuh ku bas dosa, tempas si mehuli rikut ras gegeh si i bereken Dibata salih jadi kebiaren; subuk man manusia e bage pe tinepa sideban. Ndabuhna manusia ku bas dosa erbahansa manusia lanai ngasup ngidah Dibata si nggo nepa manusia sentudu ras tempasNa e.

Melala contoh si idah subuk arah Pustaka Si Badia bage pe i bas kegeluhen si tetep wari; maka tupung manusia sirang ras keleng ate Dibata, kegeluhen manusia e lanai serta dengen gegehna e ipakena alu sia-sia. Misalna raja Saul, asum ia rembak ras Dibata janah Dibata i bahanna jadi penampatna, pemerintahen raja Saul maba kemalemen ate man rakyatna. Tapi bage i sirangkenna Dibata, kegeluhen raja Saul ras gegehna i pakena guna munuh kalak ras mpeturah kecedaan i tengah-tengah pemerintahenna.

Kegeluhenta pe, adina si sirangi Dibata, pasti erbahan kecedan dengen peturah kebiaren. Arah bahan paksa tenengta wari enda, ersura-sura Dibata gelah kita mperobahi lagu langkahta, enggeluhlah kita bagi si ngena ate Dibata jenari si pake gegehna lako erbahan si mehuli. Sabap gegeh Dibata tetap ulihna si mehuli. Emaka si pake gegehna guna nampati kalak bage pe tinepa Dibata si debanna gelah sikap. Pemere Dibata man banta eme gegehna si meherga, ula sia-siaken kesempatan sinibereken Dibata.

☞ *"Ula kal salah gunaken pemere Dibata"*



Iti telu si erbahan bene kegeluhen jelma si enterem i bas jaman nabi Jeremia erdahin, eme kalak bayak, penguasa ras pemimpin agama. Sada bagin i bas si telu enda ipandang Tuhan eme pemimpin agama: imam ras nabi-nabi. Si megogona ateta ngenenca eme maka subuk nabi-nabi i Samaria bali macikna lagu langkahna ras nabi-nabi i Jerusalem. Ituriken Dibata pe kai dosa-dosa pemimpin agama tupung si e, eme la erdibata, i Rumah Pertoton pe erbahan jahat, dalam si dalinina medalit ras

90 *Desken permaikan ngkawali rarasena, bage me Dibata ngkawali bangsaNa"*  
erbahan salah seh maka la mbiar kalak erbahan dosa.

Salah sada dosa si mbelinna eme mpegegehi kalak erbahan salah. Engkai? Sabap jelma si enterem pe bene kerina erkiteken pengajarena. Lanai kalak mbiar erbahan dosa i bas geluhna teptep wari. La lit sura-surana guna jera erkiteken pemimpin agamana mbenarken ras mpegegehi ia erbahan dosa. Jesus pe merawa kal adi erkiteken sekalak jelma bene kalak si deban. I bas Markus 9:42 *"Ntah ise gia si erbahanca maka sekalak jelma lanai erkiniteken man bangku, ulin irakutken batu penggilingen...* Emaka paksa genduari pe si jaga geluhta gelah ula sempat bene kalak si deban arah perbahanenta. Adi kita pengurus i bas Gereja jenari idah anggotata menahang si akap erbahan dosa maka murah bene kinitekenna man Dibata. Umpamana naras sekalak Pendita radu ras Pertua entah Diaken idah perpulungen e erjudi maka minter bene deba kinitekenna man Dibata. Apai ka si periudi dahinna maka ipegegehi akap... ia

*"Alokenlah dikume i pandang kalak kegeluhennta"* a si pengadilah adi lit lagu langkah si la uli.

*Ula sempat arah perbahanenta tetap ukur kalak erbahan dosa*



**I** bas dunia anak muda genduari lit istilah PHP ntaħ pe Pemberi Harapan Palsu. Istilah enda eme sada gelar si ibereken man ise saja si cakapna manis, janjina ntebu, erbahanca kalak si megi-megi tuhu-tuhu enggo yakin, tapi kinatana kai pe la lit, malahen kekecewan ras kerugin ibahanna.

Nabi-nabi Jerusalem banci ikataken PHP i bas kitab Jeremia pasal 23, erkiteken nabi-nabi e mereken pengarapen si la tuhu man bangsa e. Nabi-nabi e ngerana make Kata Dibata, tapi Kata Dibata si iturikenna e terjeng awih-awih perukurena saja, ertina bagi si akapna payo. Nabi-nabi e mabai bangsa Israel papak erkiteken nabi-nabi e terjeng nuriken si mehuli saja ngenca lalap nandangi bangsa e, sementara bangsa e enggo erdosa dengen lalar perdalanna, janah nina Tuhan erkelangken Nabi Jeremia, kentsik nari iukum me bangsa e ku bas pembuangan, adi la ia mulih kempak Tuhan. Jeremia ngerana nuriken kata kebenaran i bas Tuhan nari, si petembil ras si ituriken nabi-nabi Jerusalem. Jeremia nuriken kebenaran maka rawa Tuhan e desken angin kalisungsung, angin kaba-kaba i babo takal kalak jahat. Angin kalisungsung eme sada fenomena alam si merawa dengen ngasup ngeradasken kai si ibentasina.

I bas geluh enda, apai nge kita perlu, kebenaran tah kata tenteng tapi isina harapan palsu? Metenget kita nandangi nabi-nabi palsu i sekelewetta, si make Kata Tuhan tapi mpebelin sura-surana jine. Umpamana: ertoto kam lebe, emaka panndu tambar si kubereken e nina sekalak guru si baso. I babo si e, marilah kita kerina mulih kempak Tuhan jenari jera i bas dosa-dosanta.

*“Kesah Si Badi si nemani kegeluhen kalak si tek i doni enda”*

## Segal Tah Beras

Ogen: Jeremia 23:21-32

Minggu,  
12 Juli  
2020



**A**pa i ergan segal nta h beras? Alu la ndekah rukur pasti sepakat kita njababsa maka ndauh kal ergan beras asangkan segal. Alu sederhana, ibuat kami perbandingan, adi nukur segal kita ku ingan penggilingen page, sada guni ratah segal ergana Rp 7.000-10.000, adi beras sada guni ratah si galang ergana banci seh ratusan ribu. Bageme kepe kegeluhen manusia adi la ras Tuhan, manusia e desken segal si menahang, si la lit ergana, rapuh, dingan iombang-ambingken pengajaren doni enda erkiteken la lit palasna si nteguh.

Nabi Jeremia i bas ogenta nuriken man banta maka nembah kal ate Dibata pengajaren-pengajaren nabi-nabi palsu si nuriken kerna kata guak erpalasken nipina, si erbahanca bangsa e sirang ras Tuhan. Emaka merawa Tuhan nandangi nabi e, janah nina Tuhan "Aku jadi imbang nabi e". Nabi-nabi e mabai kegeluhen bangsa Israel papak alu pengajarenna si la erguna. Erkiteken si e bangsa Israel desken segal si enggo rapuh, menahang erkiteken lanai icikepna kiniteken bagepe perpadanenna ras Tuhan.

I bas paksana pagi kegeluhenta enda teridah me siapai kita, segal tah beras. Adi labo kita paguh tedis i bas kiniteken ras palas Kata Dibata, kabang me kita iembus angin perbeben ras pengajaren doni enda si papak. Kai pe labo ngasup ngisi geluhta alu kuh adi la kin ras Tuhan. Sen, erta, juma, kebayaken, prestasi la ngasup nggantiken ingan Dibata si ngisi geluhta. Marilah si pepaguhi lalap kiniteken ras kiniersadanta ras Dibata. IA tetap jadi si pemena i bas geluhta, ula kal sempat si bahan IA desken gundur i teruh papan i bas keguluten dingan latih ukurta, maka sidahi IA.

☞ *"Meherga adi patuh i bas kiniteken"*



**M**berat kin ndalanken Kata Dibata? Enda me si enggo jadi salah sada percakapen jaman nabi Jeremia. Subuk pemimpin agama ras kalak Israel enggo erpengakap maka Dibata enggo namaken baban ku bara kalak enda. Nembeh kal ate TUHAN kune pemimpin agama ras bangsaNa erpengakap maka kai si turikenNa jadi baban man bana. Maka ula cakapkan si e nina TUHAN, janah ibuangNa ateNa ise si ngataken maka Kata Dibata jadi baban man bana.

Engkai maka tema enggo jadi baban? I bas ayat 36 maka enggo iputar balikken bangsa enda Kata Dibata. Enda rehna arah nabi-nabi perguak si nuriken Kata Dibata alu guak seh maka kalak Jahudi pe kerina enggo tertipu.

I bas kegeluhen enda kimaun maka megiken kotbah palsu alu penuri-nuri si labo erpalas Pustaka Si Badia tempa entabeh tangtangna megikenca. Tapi kepeken kedungenna mberat perban labo bage pedah Dibata. Lit keluarga si tertipu arah penebu-nebu Panditana. Enggo keru kerina dayakenna rumahna ras usahana guna dahin Gereja nina. Kenca keru kerina panditana ndai lanai ertanggung jabab. Tangtangna megah akapna ikut jadi tim pelayan Gereja tapi dungna geluhna terlunta-lunta. Enda nuduhkan maka adi la payo pengantusi kerna Kata Dibata maka banci labo reh nahangna baban nggeluh tapi justru reh beratna. Labo perban Dibata maka mberat tapi perbahan pengantusina si lepak. Adi payo pengantusinta Kata Dibata maka labo mberat ndalanaken Kata Dibata. Maka mberat deba akap kalak eme perban lenga iantusina situhuna kai kin sura-sura Dibata i bas geluhna.

☞ *“Labo Kata Dibata si mberat tapi adi la payo pengantusen”*

# Tanggungjawab Pemimpin

Ogen: Jeremia 24:1-10

Selasa,  
14 Juli  
2020

PENGLIHATAN TENTANG DUA  
KERANJANG BUAH ARA  
(JEREMIA 24:1-10)



**T**eridah tanggungjawab pemimpin arah renungenta sendah. Lit dua raga buah ara. Sada seh jilena, sada nari seh macikna. Raga si mejile e desken bangsa Israel si ibuang ku Babil maka ia tetap ikelengi dengen ijagai TUHAN. Janah i bas pusuhna pe turah ketedehen ate nandangi TUHAN si enggo milih bangsa Israel. Bage pe i bas paksana pagi maka mulih bangsa enda ku Juda inganna ndube sope ibuang.

Tapi man Raja Sedekia ras pemimpin-pemimpin bangsa enda maka ia icidahken desken sada raga buah ara si macik la teralang. Janah nina TUHAN, "*Kudabuhkan man bana cilaka maka nggirgir kerina bangsa-bangsa babo doni enda. Kerina kalak nguru-ngurusa, kalak ngguro-guroken ia, nggombang-gombang i i bas ingan i ja ia enggo Kukerapken. Kerina bangsa-bangsa e make gelarna jadi sumpah. Kubereken man bana perang, kelihen, dengen penakit seh maka sada pe lanai lit tading i negeri enda si enggo Kubereken man bana ras man nini-ninina nai.*"

Pemimpin enda me ndube erbahanca maka bene kerina sada bangsa. Merincuh ia rusur megi kotbah nabi palsu bagi nabi Hanania. Emaka la ikutkenna kai nina TUHAN arah nabi Jeremia. Papak pemimpin i bas perintah Tuhan. Mahan bana papak rakyat si ipimpinna. Sekalak pemimpin mbelin kal tanggungjawabna nandangi kalak si enterem. Emaka i bas Jakub 3:1 isuratken, ula kam kerina ngajar, kalak si ngajar lebih pagi iadili. Enda ertina maka lain tanggung jawab kalak si jadi pemimpin asa perpulungen. Erdandanken si e mari kita kerina si dalanken tanggungjawabta sekalak-sekalak bagi si ibereken Dibata.

☞ "*Tanggungjawab Pemimpin lebih asa kalak si ipimpinna*"

# Bangsa Si Mekeng

Ogen: Jeremia 25:1-7

Rabu,  
15 Juli  
2020



**N**ggo 23 tahun bangsa Israel ipersingeti gelah robah dingen jera i bas dosa-dosana nari man Tuhan. Menaken Jeremia ningetken kerna pertobatan bangsa e arah penembahen berhalaberhal nari, tapi la diatena. Emaka bangsa e igelari Tuhan bangsa si mekeng. Masa 23 tahun e cukup ndekah, kidekah e Tuhan saber nimai ntah robah nge pagi bangsa Israel e. Tapi la ia robah-robah. La lit sura-surana mperobahi lagu langkahna, emaka Jeremia lanai mpersingeti gelah bangsa e tobat, tapi berita si ipesehna eme kerna kepastin pengukumen man bangsa e.

Bangsa Israel arus ngenanami pembuangan ku Babil kidekah 70 tahun. Kenca 70 tahun maka mulihi Dibata engkelengi bangsa e. Situhuna pembuangan e pe labo tanda Dibata lanai mediate, tapi enda sada bentuk pendidikan rohani. Gelah mulihi bangsaNa erkiniteken man Tuhan alu payo ras dem penalemen man Tuhan, sabap i bas taneh pembuangan seh ndarat bas pembuangan nari pe Tuhan tetap mperdiateken ia. Tapi pengukumen e arus jadi gelah kedolaten Tuhan teridah.

Tuhan e dem perkuah ate ras saber. Tapi saber Dibata e arus si respon alu ketutusen ras kepatuhen nandangi kataNa. Bicara ukum Tuhan pe, situhuna enda me salah sada cara Tuhan mabai pertobatan man banta. Emaka tetaplah ngelakoken pertobatan tep-tep wari sabap la si eteh asa ja saber Dibata e man banta. Bahanlah maka Kesah Si Badia erbahanca kita ertedeh ate guna reh deherna ras Tuhan. Ula si pekeng pusuhta guna robah, tetaplah setia ras nggeluh badia.

☞ *"Dibata e dem kesabaren tapi pe adil"*

# Ukumen Tuhan Pasti Reh

Ogen: Jeremia 25:8-14

Kamis,  
16 Juli  
2020



Lit sada kuan-kuanen nina "malang tak dapat di tolak untung tak dapat diraih". Kuan-kuanen enda ngerana kerna kejadiin si la bagi ukur la terelakken. Adi enggo seh paksana pasti jadi ngkenai geluh manusia. Pas kal bagi prediksi para ahli luar negeri sanga kasus virus Corona. Ikatakenna maka Indonesia pasti ikut ikenai virus e sabap penyebarena cepat. Amingia bas paksa e kita ras pemerintah la tek. La ndekahsa reh me virus Corona ndai nderpa kegeluhenta. Bangsa Israel pe labo tek sanga kataken Jeremia man bana reh pagi pengukumen Tuhan adi la jera-jera i bas dosa. Emaka seh kal dekahna Tuhan nimai perobahen bangsa e gelah mulihi ku Tuhan. Tapi ban la diatena, enggo seh sibar rencana Tuhan. Ukumen e isingetken bas ogenta enda pasti reh. Adi Tuhan enggo ngerana la banci lang pasti isehkenNa. Megati nina Dibata Si Maha Sabar, tapi ate-ateta lagu langkahta. Si ula ningen e meriah si akap ngelanggarsa. Payo Tuhan e maha sabar, janah nggo cidahkenna e man banta alu la alang-alangen. Tapi Dibata e pe Maha Adil. Si salah arus iukum gelah jera. Ula si cubai Dibata, sibar-sibar kesabarenNa ngenca ngetehsa. Adi nggo reh pengukumenNa seh kal ngerina la terbayangkan kita. KerincuhenNa sada ngenca gelah kita nggeluh bagi sinisurakenNa.

Emaka marilah sope reh pengukumen Dibata e, si jagai banta. Pesikap kiniteken ras caranta ersembah man baNa, si pepayo hubungenta ras temanta manusia. Akuken kerina salahta, maka nusur perkuah ateNa. Arah perkuah ate Dibata kita nggo ndatken keselamatanen.

☞ *"Ula melantar ukumen Tuhan pasti reh"*

## Calung Pernembeh Dibata

Ogen: Jeremia 25:15-26

Jumat,  
17 Juli  
2020



**A**di Dibata enggo nembeh dengen merawa, i bas paksa asi kentsik e lanai banci kai pe dengen ise pe mahanca la jadi bagi kai si enggo isurakenNa. Sabap isehkenNa nari nge kai si enggo ibelaskenNa, i je me teridah kuasaNa bas doni enda nandangi kerina tinepaNa. KuasaNa e la terbatas ruang ras waktu, ijape berlaku kerna kuasa Tuhan. Emaka adi cilaka man bangsaNa e si enggo iturikenNa tentu jadi me keruntuhen, jadi me tangis, jadi me kelungunen ijapa pe i bas doni enda.

Bage me si jadi nandangi Bangsa Israel "enda calung anggur si isina alu rawangKu. Berekenlah man bangsa-bangsa kuja kam Kusuruh, jenari suruh inemna." Bangsa si ikut nginem arah calung pernembeh ate Dibata e mbewatmbewat me ia, bene pe ukurna janah talu me ia ibas peperangen. Cara si ibahan Dibata tuhu-tuhu mahanca kerina bangsa-bangsa jera dengen erkadiola, sabap enggo sempat nginem tare calung e.


Enda jadi pelajaran meherga man banta, calung pernembeh ate Dibata e banci arah pengeleginta si la patuh kempak Tuhan. Calung pernembeh ate Dibata e enggo sikap katawari paksa pe iinemken man kalak si la patuh man Dibata. Ola ka min jadi bage bas kegeluhenta. Ertekad min kita gelah la sempat idudurken banta calung pernembeh ate Dibata e. Kata Dibata enda ngajuk kita gelah alu saber dengen mindo man gegeh Tuhan. Sabap arah gegeh e banci kita nilahken calung pernembeh ate e. Lakokenlah tetap si mehuli si ngena ate Dibata i bas kerina dampar geluhta.

☞ "Silahi calung pernembeh e"

# Tuhan Nadingken BangsaNa

Ogen: Jeremia 25:27-38

Sabtu,  
18 Juli  
2020



Tuhu-tuhu ngeri kata-kata Dibata man bangsa si lalap la patuh man bana. Kata Dibata erkelangken Nabi Jeremia ".....gelah ia minem seh mabuk dinging mutah, ngayak guling lanai keke. Kune la ia nggit ngalokenca, kataken bana si merekenca enda Tuhan si Mada Kuasa, emaka terpaksa inemndu." Kenca ialoken bangsa e jadi me bage i bas ia, emaka paksana me Dibata erdahin ncedai kutaNa. Erdegum me Tuhan i langit nari, erlenggur me IA i datas langit si mejanjangna nari. Paksana Tuhan erperkara ras bangsa-bangsa. Asum si eme maka cilaka ngkenai bangsa e sada-sadai, angin meter reh i tampuk doni nari. Kalak si mate pe lanai meherga, ia enggo ersada ras sampah-sampah si ergun-gun.

Andiko cedana ate bicara kita nggeluh i bas kinirawan Dibata dinging paksana Dibata nadingken bangsana. Kuja nari kita ngadu? Kuja nari kita erpengarapen? Kuja nari inganta erpengendes. Tuhu-tuhu kengerin enggo seh bas doni enda. Asum bencana virus covid 19 entah pe corona merebak, tempa-tempa enggo bage kejadiinna. I negara Italia, nterem kal kalak si mate ban virus enda ndai emaka lanai ia meherga bahkan kenca ia mate lanai banci lit keluarga si ikut naruhkenca. Ban i bas negara sejahtera seh maka maitna banci denga ipekena ku bas peti, adi lang banci nge jadi bagi ogenta sendah enda.

Emaka genduari si renungken "Me labo Dibata enggo nadingken kita bagi si pernah ibahanNa man bangsaNa ndube?" Me Dibata denga inganta ertoto, erpengendes dinging erpengarapen?" Terpujilah Tuhan. Immanuel Dibata ras kita.

☞ "Sikataken: ula kal tadingken kami Tuhan"

## Mperobahi Lagu Langkah

Ogen: Jeremia 26:1-11

Minggu,  
19 Juli  
2020



Lit sekalak perbulangen si nuri-nuri man Pandita, iturikenna maka kegeluhen jabuna sangana rayung. Penyebab rayung jabuna e, eme erkiteken ndeharana lanai nggit ngalemi kesalahen si pernah ilakokenna. Kenca iselidiki Pandita kesalahen bapa enda eme rusur ia ngelakoken kekerasan nandangi ndeharana. Janah kepeken enggo rusur ka ia mindo maaf man ndeharana, adi tangtangna ia mindo maaf nggit denga nge ndeharana ndai ngalemisa, tapi tep-tep ia mindo maaf, lalap denga iulihina lagu langkahna ngelakoken kekerasan man ndeharana ndai. Emaka lanai ngasup ndeharana ndai ngalokensa.

Tandana kalak jera, eme nggit ia mperobahi lagu langkah. La bias kita mindo pengalemi i bas kesalahenta man Dibata entahpe man kalak si deban, tapi si ulihi denga ka perbahanenta si la payo ndai. Enda me si jadi man bangsa Juda i bas perenungenta wari enda. Bangsa e mindo gelahna isampati Dibata, tapi lagu langkahna la iperobahina. Bangsa e ras Rumah Pertoton ipeseri Dibata ras Silo sanga jaman anak-anak Eli. Ija paksa si e, anak-anak Eli sitik pe la terajarken ras la nggit mperobahi lagu langkahna man Dibata.

Perenungenta enda mabai kita ngargari dirita i adep-adepen Dibata. I bas kita ertoto ras mindo pengalemi dosa man Dibata, enggo nge sedalenen e ras usahanta guna mperobahi lagu langkahta si la payo? Sabap rusur kal kita mindo pengalemi man Dibata, tapi kita pe la ngasup ngalemi salah kalak. Emaka megermet ras tetaplah si siksiki perbahanenta, gelahna reh ngasupna kita jadi anak-anakNa.

„Nggit Jera ras mperobahi lagu langkah eme bukti kinitekenta man Dibata“

## Si Nuriken Alu Tangkas

Ogen: Jeremia 26:12-15

Senin,  
20 Juli  
2020



Bulan Desember tahun 2019, sekalak dokter si gelarna eme Li Wenliang, ia erdahin i rumah sakit negara China, *Wuhan Central Hospital*, enggo mereken persinget man pemerintahen bagepe departemen kesehaten bahkan polisi i bas kota Wuhan, maka arah pasien si itanganina, iidahna lit sada virus entahpe pinakit si mbaru, si lenga tertambari ras lit potensi mewabah i bas kota e. Tapi kai si ikatakenna e, justru enterem kalak si nembeh man dokter e. Ikatakenna kalak enda, gelahna dokter e ula mereken pernyataan si erbahanca kalak resah ras si erlebihen. Janah ia itangkap polisi erkiteken persinget si katakenna e. Padahal kai si katakenna dokter e ras itemukenna e tuhu-tuhu lit ras kedungenna jadi wabah i bas kota Wuhan bahkan seh ku belang-belang doni si tandai kita alu gelar Virus Corona Disease 2019 ntahpe Covid-19.

Dokter enda me contoh kalak si nuriken alu tangkas kerna kebenaren i bas kegeluhenta enda. Amin bage gia, rusur kalak si nuriken alu tangkas e erbahanca nembeh ate kalak si deban. Janah mekatep ersura-sura kalak entahpe pemerintah guna mpesinik ia alu ipenjaraken entahpe ibunuh. Enda me si ilakoken bangsa ras pemerintahen Juda man nabi Jeremia. I bas ia nuriken kebenaren Kata Dibata alu tangkas man bangsa e, enterem kalak si ersura-sura guna munuh ia. Amin bage gia, Jeremia la mbiar ras la putus asa, sabap tek ia, Dibata kap si nuruh ia ras mereken Kata e man bana guna ipeseh man bangsa Juda. Kegeluhenca bermasyarakat, perpulungen, bagepe i bas jabunta, tentu lit ka nge ras situhuna perlu kalak bagi Jeremia enda. Janah banci saja kita me si ipilih ras itamakan Dibata guna nuriken Kata Dibata e alu tangkas.

☞ *"Alu melasken kata tuhu, kalak nggo ncidahken keadilan"*



**J**eremia isuruh Tuhan mpersingeti pemimpin-pemimpin agama si la patuh man Tuhan. Si e erbahanca nembeh ate pemimpin-pemimpin ras iman-imam bas Rumah Pertoton, emaka itangkapna Jeremia ras ibunuhna atena. Jeremia nogan pemindon kalak enda guna muat perkatanna ngulihni ras nuriken si bagi sura-sura kalak enda saja. Jeremia ngulihni nuriken maka kuasana ngerana reh bas Dibata nari, janah kerina jelma arus jera adi lang merawa Tuhan. Pang ia ngalaken kematen sabap ietehna si enda ilakokenna erkiteken bekas Tuhan nuruhsa.

Emaka megini perkatan Jeremia, erkusur ukur piga-piga pejabat ras bangsa Israel. Tua-tua Israel ngatakenca maka la patut Jeremia iukum mate. Ituriken tua-tua ndai ka pe man jelma si nterem kerna uga nabi Mikha ngerana kerna ukumen bas masa Raja Hiskia. Tapi Raja la ngukum ia. Erkiteken berita nabi Mikha ndai robah raja ras mindo perkuah ate Dibata man bangsa e. Emaka la jadi mara kelesa man bangsa e. Tua-tua Israel ndai mbela Jeremia, i teruh penjemba kuasa Tuhan.

Jadi sekalak suruh-suruhan Tuhan megati ibereken Tuhan sada tugas si mberat man banta. Nehken berita meriah ras berita pengukumen, sada kata pe ula uraki. Adi Berita Si Meriah, kerna pengalemi Tuhan, pengepkepenNa, murah nurikenca ras merincuh kalak megisa. Tapi adi nuriken pengukumenNa, persingetNa nandangi dosa banci jadi turah si ersegat ate banta. Tapi Kata Tuhan arus tetap iberitaken. Sada koma pe la banci urak, sabap Dibata mbela suruh-suruhanNa.

# Patuh Man Tuhan

Ogen: Jeremia 27:1-11

Rabu,  
22 Juli  
2020



**N**egri Babil i teruh kuasa raja Nebukadnesar eme musuh Israel, si nerang Israel la erngadi-ngadi. Gegeh bangsa e, erbahanca bangsa Israel arus mindo pertolongan man bangsa si deban nari.

Tapi perban nggo ipake Tuhan kin Nebukadnesar guna nehken pengukumen man bangsa e, perban dosa-dosana, talu me bangsa Israel. Janah isuruh Tuhan bangsa e gelah takluk man raja Nebukadnesar, nggit ibaba ku Babil jadi tabanen.

Tapi enterem nabi palsu ras imam-imam ngataken e la tuhu. Ula kita nggit talu, bage nina man bangsa e. Emaka reh tenah Tuhan, ngatakenca Nebukadnesar enggo ipake Tuhan. Pengukumen bangsa e eme i Babil, emaka arus nggit patuh man Tuhan alu patuh nandangi perintah raja Babil ikut ku pembuangan. Si la nggit ikut berarti nogan perintah Tuhan, nulak rencana Tuhan, ikenai pinakit si la lit tambarna, mate bas perang ras kelihen. Si enda ikataken Tuhan sabap sura-suraNa bangsa e erlajar ngulih uga ermeteruk ukur i kuta Babil.

Menukah patuh adi perintah e bagi ukurta. Tapi adi la kenca bagi ukurta mesera erbahanca patuh. Mawen hal-hal luar biasa jadi arah hal-hal si sepele. Emaka kepatuhen e labo saja perlu bas kita sangana sekarat ras genting, benakenlah patuh i bas hal-hal si kitik lebe. Contohna cuci tan ope man, mencegah pinakit bengket ku dagingta. Nggalari PLN ope jatuh tempo. Minem tambar sue anjuren dokter. Alu kepatuhen si jagai banta arah marakelesa nari. Si ikutken Kata Tuhan alu setia, bujur bas perbahanenta man Tuhan bage pe man kalak sideban.

☞ *"Patuhilah man Tuhan maka ikeliniNa kam"*

## Silahi Berita Guak

Ogen: Jeremia 27:12-22

Kamis,  
23 Juli  
2020



**P**ernah viral i bas media sosial *facebook* kususna kalimat si bagenda: "Saya Terima Tantangannya!! Mari kita banjiri dinding facebook ini dengan berita-

berita positif supaya berita-berita negatif segera tertutup dalam media sosial ini". Nterem kalak si ikut ibassa alu namaken foto erkebaya, foto ras pasangan geluhna, foto pangan-pangan si erban selera, foto traveling/ bertualang/ gawah-gawah. Sabap alu ngenen si bage rupa, jadi lupa kita berita-berita palsu, *hoax* si banci mpengaruhi perukurenta mahanca kita la tenang.

Berita guak eme berita si la tuhu. Berita si la tuhu adi ipebelang enterem kalak si erkitik ukur, enterem kalak si merawa seh pe banci jadi perubaten, lit deba lanai ka ia pang ndarat rumah sabap ia si iberitakan bas berita si la tuhu e. Seh kal buena dampakna. Nina kuan-kuan "fitnah lebih kejam dari pembunuhan." Pembunuhan labo secara fisik tapi karakter, lanai pang ngerana, lanai pang nuriken pendapat, ras sidebanna.

Oratenta ay. 14 nurikenca maka ola begiken nabi-nabi si nuruh kam gelah ola talu i teruh kuasana. Itipuna nge kam. I bas jaman nabi Jeremia i tengah-tengah bangsa Israel pe melala nabi-nabi perguak si erdahin guna nguntungken dirina jine. Kai si beritakenna berita si la tuhu banci mabai bangsa e papak. Guna si e me maka bangsa e arus pentar dengen tetap erpengendes man Tuhan. I bas berita *hoax* si lit, pentarlah, saring dengen cek gelah banci situriken si benar. Terdauhen ola kita terpengaruh seh pe si suhsahi ukurta bage pe ukur kalak side ban.

✍ "Jaga pusuh ras biberta"

## Nubuatan Tuhu-tuhu Jadi

Ogen: Jeremia 28:1-17

Jumat,  
24 Juli  
2020



**N**ubuat artinya: menyatakan lebih dahulu peristiwa-peristiwa yang akan terjadi, biasanya melalui perantara seseorang misalnya nabi. Nabi-nabi si

erdahin i bas jaman Padan Si Ndekah kerina ernubuat kususna kerna kerehen Mesias eme Jesus e i bas jaman Padan Si Mbaru. I bas oratenta enda sekalak si gelarna Hanania anak Assur ngatakan maka Dibata maba mulih kerina perlengkapen Rumah Pertoton ku Jerusalem, janah e la tuhu. Kata Dibata si tuhu-tuhu reh i bas Jeremia si nuriken kematen Hanania sabap iajukna bangsa e mberontak. Payo kai si ikatakan Jeremia tuhu jadi man Hanania, mate me Hanania i bas bulan pepituken tahun si e ka. Nabi palsu pe beluh muat ukur bangsa Israel e alu ngatakan si la tuhu. Adi tek kin bangsa e maka ia enggo ibabai papak dengen mberontak nandangi Dibata. I je me tangkas teridah peran nabi-nabi si tuhu-tuhu persuruhan Dibata gelah bangsa e dat terang guna ndalanken bagi si iarapken Tuhan Dibata man bana.

Jaman enda melala kalak si njumpai kalak beluh guna ngeramal dirina, pendahinna, teman geluhna, ras sidebanna. Ramalen labo seri ras nubuatan. Ramalen e bekas olah pikir manusia bahkan banci jadi pe kai si isurakenna man katankenna ku kalak si deban, ramalen pe banci alu penampat kuasa-kuasa gelap si mahanca ia beluh ngerana si bage rupa kerna sesekalak jelma, dengen mahanca kalak si megisa pe tek. Biasana guna kepentingen diri sendiri, misalna kebayaken. Tapi adi nubuatan ia nuriken kerna si tuhu bakal jadi sabap pemetehna dengen si iturikenna e rehna i bas Dibata nari. Nubuatan e ngerana kerna penggenapen kai si enggo isuraken Tuhan i bas si enggo jadi.

“Ula tek nandangi ramalen, tapi tek nandangi nubuatan Tuhan”

## Erdahin Guna Kiniulin Kuta

Ogen: Jeremia 29:1-9

Sabtu,  
25 Juli  
2020



**E**nggo pe ringan i pembuangan Babil lit denga ka nabi-nabi palsu terus erdahin si erlawanen ras kai sura-sura Dibata. I Babil nina nabi palsu ngerana man bangsa enda, maka meter me ia mulih i taneh pembuangan nari ku negerina Juda. Tentu berita enda sada berita keriahen man kalak Juda si ibuang ku jah. Tapi bage kin peraten Dibata?

Si idah maka arah surat nabi Jeremia enda labo bage peraten Dibata. Maka rencana Dibata bangsaNa lit pitu puluh tahun ringan i negeri pembuangan. Emaka nina Jeremia ula begiken nabi-nabi si ngerana si ngataken minter me ia mulih ku negerina. Nina Jeremia, *'Pajekkenlah rumah janah tetap lah kam ringan i je. Suanilah peken jenari pan ulihna. Erjabulah kam dinging mupuslah. Kenca bage pejabu ka anakndu maka ia pe mupus ka. Arus maka ertambah-tambah beliganndu labo erkurangna. Erdahinlah guna kiniulin kuta-kuta ku ja kam enggo Kubuang jadi tabanen. Ertotolah guna keperluan kuta e sabap adi sikap ia kam pe ikut sikap.* Enda nuduhken kegeluhen si normal. Alu bage kerina kegeluhenna rikutken uga kin kearusen nggeluh. Salah sada eme erdahin guna kiniulin kuta i ja kam tading. Enda tanggungjawab bangsa enda. Janah tentu man banta pe pedah enda seh ulina. Enda me kalak si ikataken "proaktif." Ia maba perubahren, maba kiniulin i ja ia tading. Pernah kami tading i bas sada ingan si la lit i je kalak Kristen. Lit i je sada lapangan bulu tangkis si enggo ndekah la ipake perban la lit net na. Itukur kami netna janah mulai paksa si e kerina perbapan i bas kompleks ndai enggo er-olahraga mulihi. Cuba ukuri kai si banci si bahan maba kiniulin man inganta.

☞ "Adi si suan si mehuli maka si mehuli ka nge si turah"

## Rencana Si Mehuli

Ogen: Jeremia 29:10-14

Minggu,  
26 Juli  
2020



**S**alah sada biak Dibata si sembah kita eme Dibata si erban rencana. Menaken tembe doni enda si idah maka IA dem alu perencanaan si mehuli. Emaka i bas Kejadin 1 si idah uga raturna doni enda itepaNa ras kerina isina. Bage pe kenca manusia ndabuh ku bas dosa maka situhuna bage manusia erdosa, bage Dibata erban perencanaan guna keselamatan man manusia. Arah kesusuren diberu merperken takal nipe si e nuduhkan kerna Jesus si naluken kuasa iblis ras kematen. Bage me si idah enggo kenca bangsa Juda i buang ku Babil teridah maka Dibata erbahan perencanaan si mehuli. Tuhu pitu puluh tahun dekahna bangsa enda ringan i pembuangan. Enda sada kesempatan man bangsa enda rukur kerna uga hubungenna ras Dibata sedekah enda. Maka situhuna sada pinakitna eme pekulah-kulah. La lit kawitenna kinitekenna ras perbahanenna. Nen pertutusna nehken persembahen la bage jahatna ia i bas geluhna teptep wari. Emaka sada bagin janji TUHAN man bana i pembuangan enda eme "idaramindu Aku alu bulat ukur." Enda me sada rencana Dibata si mehuli man bangsaNa. Man banta pe genduari adi kita beluh rukur, maka kerina kejadin i bas geluhta sada si ate TUHAN jadi banta eme uga kita ertedeh ate dengen nembah IA alu bulat ukur. Enda ertina maka lanai lit ise pe banci ngganggu hubungenta ras TUHAN. Subuk keluarga, dahin, hobi, adat, duit rsd. Reh kita tetap ku IA alu bulat ukur maka IA ngenca Dibata si tuhu-tuhu si patut isembah kerina jelma. Penembahen e teptep wari, alu ratur, lit tetap relasina ras Tuhan. Janah situhuna guna si e ngenca kita itepa Dibata ku doni enda.

*☞ Rencana Dibata si mehuli eme gelah kita ersembah baNa*



“Kai nge sura-sura Tuhan maka lit virus Corona enda Pendeta?” Bagenda me penungkunen sekalak perpulungen, dengen mungkin jadi, i bas wabah Corona si jadi i bas tahun enda i Indonesia, penungkunen perpulungen enda pe mungkin jadi penungkunenta kerina perpulungen Tuhan. Ijabap kami penungkunen enda, “labo si eteh kai sura-sura Tuhan, tapi tek kita maka i bas iijinken Dibata si enda kerina jadi, sura-suraNa eme si mehuli man banta, labo guna mbeneken kita.”

Melala situasi i bas kinata kegeluhenta si tuhu mesera si akap ngantusisa engkai maka kerina e jadi, bali ras situasi bangsa Israel si sebagin enggo itaban ibaba ku Babilon. Bangsa enda nungkun-nungkun, engkai maka kiniseran si mesangat jadi man bangsa Dibata. Jeremia 29:15-23 eme sada jabap Tuhan kerna si jadi penungkunen i bas ukur bangsa e. Labo la iperdiateken Tuhan bangsaNa, tapi nina Tuhan, bangsa e itaban, janah si tading denga iukum alu perang, kelihen, dengen ielis-elis erkiteken bangsa e la patuh man Dibata si la erngadi-ngadi enggo mpeseh kata persinget erkelangken nabi-nabiNa. Alu kata si deban, kiniseran e jadi gelah bangsa e nandai Dibata situhu-tuhu janah mulih kempak IA, nadingken lagu langkahna si jahat. I bas erbage-bage perbeben dengen kiniseran si jadi i bas geluhta, banci jadi turah i bas ukurta, maka lanai iperdiateken Dibata aku, itadingkenNa aku. I bas wari enda tek kita, kai pe si sangana jadi, iijinken Dibata, iperdiatekenNa kita, janah irancangNa kerina guna kiniulinta. Si penting genduari eme tetap megenggeng, nimai Dibata mpetangkas sura-suraNa.

“Sura-sura Dibata kerina guna kiniulin”

# Iukum Si Perguak

Ogen: Jeremia 29:24-30

Selasa,  
28 Juli  
2020



D esember 2017, petugas polisi i Kansas, Amerika, nembak mate sekalak dilaki si la ersalah erkiteken laporen berita palsu si ilapurken man polisi. I bas laporen e, ituriken maka lit sekalak diberu ras sekalak anak isandera i bas sada rumah. Petugas si reh ku rumah e njumpai sekalak dilaki i darat janah erkiteken curiga, polisi nembak dilaki e seh mate. Laporen palsu enda i Amerika igelari *swatting* si ukumenna seri ras teroris, erkiteken dampakna si mengeriken.

Berita si la tuhu, bohong, *hoaks* eme sada berita si la sue ras lenga pasti kebenarena. Amin bage gia, bage berita e isebarken, muncul pro ras kontra, jadi me keguluten ukur, si erbahanca guntar i bas masyarakat.

I bas ogenta Jeremia 29:24-30, nembek kal Tuhan man Semaya, anak kuta Neheleam si ngirim surat man anak kuta Jerusalem dengen man Imam Sepanya ras imam-imam si deban si isina mindo gelah Jeremia iukum erkiteken meritaken berita pengukumen Dibata man bangsa e. Kata-kata Semaya enda eme kata guak, erkiteken sura-surana gelah bangsa Israel la tek man kata tuhu si ipeseh Jeremia, dengen gelah bangsa Israel la tek nandangi pengukumen Dibata. Emaka iukum Dibata Semaya ras kesusurena alu ukumen si mesangat seh maka masap kerina kesusurena.

I bas jamanta enda, melala informasi ras berita-berita si murah si akap mesehsa man kalak si deban. I bas si e turikenlah si benar dengen mehuli, pedaulah kata guak, sabap tek kita, pedas ntah melawen, iukum Dibata me perguak alu cara Dibata jine.

☞ "Katakən ue adi ue, lang adi lang"

## Pengarapen i Bas Keguluten

Ogen: Jeremia 30:1-17

Rabu,  
29 Juli  
2020



Sekalak motivator i bas sada seminar, ijemakna sada gelas kaca si isina lau, saja la dem iisina. Emaka isungkunna peserta seminar ndai, kai nge si idahndu si ku jemak bas tanku e. Sebagian besar peserta seminar ndai ngatakensa maka si idahna eme gelas si setengah kosong, piga-piga kalak ngenca si ngidah gelas e lit isina setengah gelas lau. Menurut motivator enda, kalak si ngidah kai si jemakna e eme setengah gelas lau ia fokus ku bas pengarapen, sedangkan kalak si ngidah enda gelas setengah kosong lebih cenderung berfokus ku bas masalah.

Kata Dibata si isuratken nabi Jeremia enda pe mabai bangsa Israel ngidah pengarapen i bas situasi pembuangan si niialami bangsa e. Emaka ikatakenNa padanNa man bangsa e, maka aminna pe ia ngenanami keguluten, tapi Dibata tetap mereken kegeluhen man bangsa e. Janah Dibata la terjeng ibelaskenNa saja, tapi gelahna e isuratken, tujunna enda eme gelahna lit si man gelemen kalak Israel. Enda me tandana maka Dibata la seri ras nabi-nabi palsu si mereken janji-janji palsu si la terlakokenna. Janji pembebasen ras pengalemi dosa sini ipadanken Dibata tuhu-tuhu ipesehna, janah la saja man bangsa Israel, tapi pe man kerina bangsa arah Jesus Kritus.

Renungenta sekalenda nuriken maka nabi Jeremia pe nggejapken maka ia ndatken si la mehuli i bas ndahiken dahin Tuhan i tengah-tengah bangsa Israel. Ersura-sura bangsa e guna munuh ia, erkiteken kebenaran si ituriken man bangsa Israel. Padahal kai si ilakoken Jeremia e, eme guna mabai bangsa Israel gelahna jera i bas kejahatenna, janah ula min sempat bangsa e ndatken ukumen i bas Dibata nari. Si mehuli si ilakoken Jeremia, ibalas bangsa Israel alu kejahatan.

“*Tetap iberekenna si mehulina*”

## Aku Si Nambari Lukandu

Ogen: Jeremia 30:18-24

Kamis,  
30 Juli  
2020



**I**bas sada wari lit sekalak nande si mekpek anakna pake rotan, seh enggo lit luka tan anakna ndai. Enda ilakoken nande e erkiteken anakna ndai enggo make sen sekolahna ku si la mehuli. La ieteh anak e maka erpala-pala kal nge nande e ngelitken uang sekolahna e. 8 bulan dekahna ibuniken anak e, tapi kenca reh surat i sekolah nari, sengget kal orangtuana, emaka erkiteken enggo emosi ia, ibuatna pemekpek tilam si bahanna bas rotan nari. Ngandung kal anakna ndai, janah ngaku salah. Ngidah si e, reh nandena ndai, janah mambur iluhna, ibuatna minak emaka itambarina luka anakna, bekas ipekpekna ndai, ikatakenna man anakna ndai gelahna ulanai iulihina perbahanenna. Iueken anak ndai, janah dakep nandena anakna alu dem keleng ate.

Bage me gambaren si ilakoken Dibata man bangsa Israel. Erkiteken dosa ras kejahatenna, kalak Israel desken kalak si enggo terluka, ugahen janah ibahan Dibata ka ukumen man bana. Lanai lit si banci nambarisa selain Dibata. Emaka Dibata mereken padanNa maka IA jine me kari si nambari luka ras ugah bangsa Israel. Dibata me si mulahi bangsa e i bas pembuangan nari. Janah la terjeng bage saja, Dibata pe ersura-sura guna mbebasken bangsa Israel i bas kuasa dosa nari, sabap enda me situhuna luka si mekelekna kal i bas bangsa e. Bage me pengkelengi Dibata nandangi kita anak-anakNa. I bas kegeluhenta banci saja kita terluka erkiteken pengerana ras perbahanen kalak. Janah banci saja luka e erkiteken pengelegita entahpe dosa-dosanta. I bas si e si endeskenlah man Dibata, sabap IA ngenca si ngasup nambari kerina luka-lukanta.

☞ *Aku kap si pepalem kam, Aku si nambari lukandu*

## Desken Sekalak Bapa

Ogen: Jeremia 31:1-9

Jumat,  
31 Juli  
2020



**N**ina kuan-kuan kalak Inggris maka lit dua si la terbuniken i bas kegeluhen enda eme ate ngena ras mbatuk. Lit ka perpayona adi si tatap ku bas kegeluhenta. Umpamana adi mbatuk kita uga pe teridah.

Kune sibuniken pe la terbuniken adi enggo mbatuk atena. Bage pe ate ngena mesera munikenca. Sanga singuda-nguda anak perana denga kita, adi lit ateta ngena, labo si arap si seringken rusur amin kimaun erbuni-buni kita natapsa. Janah si menarik maka Dibata si sembah kita e la mela-mela ncidahkan ateNa ngena ras ateNa keleng. Enggo kenca pitu puluh tahun bangsaNa ringan i pembuangan Babil maka ibabana mulih ku negerina jine. Ersurak-surak me bangsaNa mulih erkiteken icidahkan TUHAN keleng ateNa alu tangkas. Itegu-teguNa desken sekalak Bapa man bangsaNa.

Gambaren Bapa i jenda lit piga-piga si banci si ertiken. Si pemena desken Bapa si erkeleng ate man anakNa, maka ukumen si pitu puluh tahun enda pe arus igejap bangsa enda sebage keleng ate TUHAN man bana. Jenari Bapa i jenda encidahkan bagi sekalak bapa si ngepkep ras ertanggungjawab i bas jabu bage me TUHAN nandangi bangsaNa. IA erjanji mpepulung kerina bangsaNa si merap dengen encukupi kai si perlu man bana. Arah gambaren enda tentu jadi sada pengapul ras pergegeh man banta genduari sabap kalak si tek man Jesus erbahan hubungenta ras Dibata desken sekalak anak nandangi Bapa. Jesus ngajari kita erlebuh man Dibata e "Bapa kami." Emaka sangap kal kita si er-Bapaken Dibata i bas geluhta sabap keleng ateNa lebihen asangkan bapanta si lit i doni enda.

☞ *"Malem kal ate kalak si erlebuh Bapa man Dibata"*

# Dibata Ulu Sinasa

Ogen: Kolose 1:15-16

Sabtu,  
01 Agustus  
2020



“ Jesus ulu kegeluhenku, Kam ngenca pengendesenku...” Syair lagu enda ngataken maka Jesus ulu gegehta, man baNa saja kita erpengendes, la lit Bapa bagi IA ulina si tetap mereken

kekelengenNa amin gia megati si man kelengen e la iangkana maka ia paksana i kelengi Dibata. IA ngenca Dibata si sembah kita si ngasup erbahan kita mejuah-juah dengen si mpetetap ukurta.

Dibata ulu sinasa, bas IA nari kerina kai si lit bas geluhta ras si lit i bas doni enda. IA ngasup mpetetap ukur i bas kebiaren si turah, IA ngenca ngasup mereken gegeh tupung kita lanai ergegeh, IA ngenca metehsa sura-sura si mehuli nandangi kegeluhenta. Dibata ulu sinasa. Ningetken man banta maka kita manusia si tuhuna labo ngasup sirang ras ulu e, erkiteken kita mahluk si lemah, la ergegeh. Labo kita ngasup erbahan kai pe adi sirang ras Dibata.

Selaku manusia si tetap ngarapken gegeh arah ulu e, ula nai si bahani ukurta si erbahanca kita reh dauhna sirang ras Dibata. Gelah tetap kita erbuah janah buah sini bereken kita eme buah si mehuli, mejile ras entebu si erbahanca kalak si natap-natap pe meriah dengen malem atena. Tetaplah kita erpengarapen nandangi Dibatanta selaku ulu sinasa i bas kerina dampar kegeluhenta. Adi lau, Dibata me uluna, desken terang, Dibata ulu terang e. Adi keleng ate, Dibata eme ulu kekelengen si mbelin, adi ngalemi, Dibata me ulu pengalemi. Emaka tetap ersada ras IA maka banci kita ngkelengi, ngalemi, nerangi ras sidebanna. Dibata selaku ulu sinasa njamini geluhta dengen mereken pasu-pasu si simpar man banta. Alu bage ngasup ka kita jadi pasu-pasu pe man kalak si deban.

☞ *“Dibata ulu sinasana erbahan kita lit i bas kejuah-juahen”*

# Tep-Tep Wari Reh Baruna

Ogen: Epepus 4:17-24

Minggu,  
02 Agustus  
2020



**M**erincuh kal jelma ngayaki ingan rekreasi si mbaru, entah make barang baru umpamana: baju mbaru, Handphone baru, mobil baru bagepe kerina si mbaru. Adi nggo pake si mbaru si male lanai ka ipake erkiteken nggo ka lit terbaru. Bage ka min perukurenta tetap ipelimbarui anemgia melala si la bagi ukurta si jadi, min banci tep-tep wari reh baruna. Tentu perukuren si mbaru banci jadi perukurenta adi kita tetap nggeluh i bas Tuhan.

Adi si pepayo Dibata njadikan sinasa lit i bas doni enda kerina mehuli, manusia si itepaNa seh kal ulina "Indonesia: sungguh teramat baik" la lit si la mehuli i bas kerina sinijadikan Tuhan. Manusia nge si erbahansa kai sinijadikan Dibata e lanai mehuli, emaka arah Kata Dibata enda ibabai kegeluhenta reh baruna tep-tep wari erkiteken ijaga ras ipekena-kena Dibata. Geluhta tetap ipelimbarui Dibata arah perkuah ateNa, tentu alu bage tep-tep wari reh baruna perukurenta i bas Kristus.

Rasul Paulus pe ngajuk perpulungen gelah banci min nggeluh i bas kegeluhen si mbaru, ula nai min nggeluh bagi kalak si la nandai Dibata, si la erguna perukurena. Adi kalak si bage tentu gelap denga pengertinna, lanai meteh mela. Ipelepasna dirina iitaluken sura-sura si jahat janah la alang-alangen ia ngelakoken si la mehuli. Ipersingeti man banta gelah nantangi dirinta i bas biak manusia si male, sabap manusia si male meneken bana alu sura-surana si nipu. Bukalah pusuhta arah Kata Dibata maka pusu peratenta tetap ipelimbarui Dibata seh maka banci ka kita nuduhkan kualitas Kristus i bas kegeluhenta. Silakoken si mehuli erkiteken bage kin biak kalak si ipelimbarui Kristus.

*"Dibata nggo mpelimbarui kita, nggeluhlahi i je"*





**K**esah Tuhan labo i bas Padan Si Mbaru ngenca banci si idah tapi i bas Padan Si Ndekah pe. I ja Kesah e nusur ku Basalel, tertulis i bas keluaren 31 : 1-5 bagepe Keluaren 35 : 30-33, Nina Tuhan enggo Kupilih Basalel janah Kudemi ia alu KesahKu, enggo Kubereken man bana pengertin, kebeluhen ras kengasupen erbahan barang-barang si mejile janah ngajarken kebeluhenna erbahan si mejile e man kalak sideban. Kai sinibereken Tuhan man Basalel enda arah Kesah Tuhan labo erkiteken kehebatenna maka ibereken Tuhan Kesah e man bana, tapi alu pendahin Kesah Tuhan si i bas ia erguna ulihna man kalak sideban i bas ia nggit ngajarisa. Jadi la saja nggit tapi ngasup ia makeken talenta sinibereken Tuhan guna pehuliken Rumah Pertoton bagepe nambahi kinijilen man kalak sideban.

Selaku Moria melala nge talenta sinibereken Tuhan man banta, kengasupen lako ngelakoken si mehuli ras nampati kalak si deban. Talenta si enggo ibereken Tuhan e arus nge silakoken alu mehuli, ula man banta saja ngenca ernanam. Adi kita beluh rende, pujilah Tuhan alu dem keriahen dinging bereken si mehulina. Beluh kita erdakan, tek kalak man banta adi kita je minter sikap kerina silakoken, lakokenlah si mehulina, entabeh penggulenta kalak pe meriah akapna ngenanamisa. Adi kita erbinaga bahanlah meriah akap kalak nukur binaganta e erkiteken sikap pengalontalonta, pas timbangenna, sukacita kita ngelakokensa man kalak sideban. Jadi arah kai pe pendahinta termulia Tuhan, iidah kalak gambaren Kristus arah kerina dampar geluhta, tetaplal Kesah Tuhan ndemi pusuhta gelah reh bagesna penandai kalak Tuhan arah geluhta.

# Lakoken Si Mehulina

Ogen: Lukas 19:1-9

Rabu,  
05 Agustus  
2020



**T**uri-turin Sakeus jadi salah sada pengajuk man banta gelah nggeluh tetap ertedehe ate nandangi si mehuli. Ende-enden kerna Sakeus orang pendek enda pe, iendeken anak-anak sekolah minggu, jadi sada penjemba maka kerina kalak ialoken Jesus ntah kuga gia latar belakang geluhna. I bas ogenta wari enda, teridah piga-piga cara rukur manusia.

- Sakeus, si enggo meggi kerna Jesus, merincuh kal jumpa, luar biasa perjuangan ras usahana, i bas keadan dirina si gendek ibandingkan kalak sideban. Kenca jumpa ras Jesus, amin sekali denga, turah komitmen guna nampati si enggo pernah itindesna.
- Kalak si enterem, si ngidah Sakeus selaku kalak perdosa, la pantas ndahi Jesus. Janah Jesus pe arusna ietehna e tapi labo itulak Jesus tapi rumahna ka IA ngadi.
- Dampar sideban Jesus ngidah usaha, perjuangan ras sura-sura Sakeus jumpa ras IA. Pusuh Sakeus iidahNa. Ceda pusuh ntah ukurta pe tangkas man bana. Kuga pengejapenta?

Amin ntah kai gia kata kalak, Sakeus tetap ngelakoken si mehuli akapna, la ibegikenna kai nina kalak, ia fokus man Jesus si nggit ngaloken ia. Teruskenna ngelakoken si mehuli iakapna janah Jesus njemba ras nergaisa. I bas kerina kekurangenta pasti lit kelebihenta. Sigargarilah e i bas dirinta. Ntah mbages kal pe man ukalen, ukallah! I bas tep-tep manusia dua sisi biak enda pasti lit, apai si asuhi kita eme rusur teridah. Gelah dirinta enda jadi uga litna, lakokenlah labo kai nina kalak kerna kita. Adi langa kin sikap sedekah enda, mari si pesikap. Ingetlah, Jesus la mperhitungken masa lalunta tapi masa depanta si isikapkenNa.

☞ *"Erqai kerina si mehuli, lakokenlah"*

# Tuhan Tetap Ras Aku

Ogen: Masmur 23:4

Kamis,  
06 Agustus  
2020



**P**iga-piga paksa si lepas la sitik kita si er-arua ate, virus corona si la iidah tapi ngelangketi daging kulanta erbahan kerina kita arus metenget. I rumah, 14 wari, isolasi mandiri, enda me si tetap iberitakan gelah banci njaga dirinta bagepe kalak si deban. Ulihna enterem si kelsehen, tambah aru ate sabap ekonomi terpuruk, sebagian erga murah, deba naik. Pedagang kaki lima, perjuma-juma, tukang ojek, pasar, mall tutup. Angkuten, la piga penumpang. Sebagian karyawan swasta, i rumahken alu la ndatken gaji. Lit ka si erbahan status: maka banci saja ia mate labo erkiteken virus corona tapi erketeken lanai erduit. Sabap, adi erbinaga melungen la lit si nukur. Erbage kecibal si turah. I bas paksa enda, kita ihadapken ku bas kebiaren kematen si erbage penyebabna.

Situasi enda desken penggejapen ras pengalamen pemasmur, desken kita erdalan i bas kelbung si gelap. Tapi iakukenna maka la kepe ia mbiar cilaka, amin i teruh bayang-bayang kematen. Sabap tek ia maka Dibata tetap ngkawali ia. Kuga kita? I bas kecibal si genduari, mari si usih Pemasmur, tetap kal ukurta, nerusken perdalanan kegeluhen si tep-tep paksa i teruh bayang-bayang kematen. Ula kita mbiar. La mbiar labo dalam erti, la megiken kata, persinget pemerintahta. Ula pada lebe gawah-gawah, man ntabeh tapi jaga kesehaten alu erbage cara nggeluh sehat. Minem lau hangat, vitamin arah buah ras gulen-gulen. I bas keadan enda, iajuk kita guna ngergaken si lit, kiniersadan i bas jabu, nggeluh alu sederhana. Tek kita la kita itadingkenNa, i bas paksana virus enda banci nge bene. Kenca mentasi kelbung si gelap jumpa me kita ingan terang ras tenang.

☞ *"Kam Tuhan sekawalku."*



**K**ai ertina nggeluh man banta? Banci erbage-bage si banci situriken. Janah umumna, pengangkan, pengertin ntah pe motto geluhta ncidahkan kuga caranta nggeluh i bas doni enda. I bas paksa perbeben ntah kiniseran, jati diri sekalak jelma banci teruji arah makna ras erti geluhna. Rasul Paulus i bas kiniseranna, i bas penjara iukurina, kai kin erti geluhna man kalak si deban, man doni enda. Ia rukur la guna dirina saja, sabap adi guna dirina, jelas pangen ia mate sabap kenca e minter ia ras Tuhan. I bas literature Kristen lit sada jenis sastra 'ars moriendi/seni mati' enda turah i bas abad 15 i ja lit wabah serentak i Eropa i bas tahun 1346-1353 si igelari 'kematian hitam.' I ja pandemic e lebih 200 juta si jadi korban. Enda jadi sada persinget sejarah maka i bas paksa sie turahen erbage karya sastra.

Kuga kita i bas situasi perbeben paksa si enggo lepas ntah pe si langa si jumpai, kuga kita ngidah kegeluhen enda? Iajuk kita rikutken tema ngisi kegeluhen alu mehuli. Banci sisaksiken i bas piga-piga waktu si lepas, sangana virus corona nderpa doni enda. Erbage-bage kreativitas si ibahan manusia si teridah arah status i bas media sosial. Lit si rende mere semangat, mbagiken renungen ras kata-kata motivasi. Lit si erdiakonia alu nemprot disinfektan gelah virus ras kuman mate, lit si mbagi masker, la sitik mbagiken tutorial erbahan makanen, kreativitas ras sidebanna.

I bas wari-wari si reh enda, la si eteh tantangan, kiniseran ras perbeben kai saja si man alankenta, ula bene ukurta, si isi geluhta alu erbage si mehuli, si positif ras jadi pasu-pasu.

☞ "Pakeken geluh enda kesempatan erbahan mehuli"

# Engkelengi Ras Ngalemi

Ogen: Jesaya 55:6-7

Sabtu,  
08 Agustus  
2020



**G**ereja si lit i tengah-tengah doni enda, eme Gereja si niarapken muat bagin mpekena-kena doni. Gereja si lit hubungenna ras kalak si deban. Gereja si encidahken kinirajan Dibata i doni enda.

Uga carana? Alu tetap encidahken keleng ate ras nggit ngalemi. Gereja la terjeng patuh ku bas ndalanken doktrin entah pe aturen si lit. Lebih asa si e Gereja arusna rembak ras masyarakat, mperdiateken ras nampati sekelewetna alu dem keleng ate si la pernah erbalas. Gereja labo terjeng gedung si la pernah bergerak. Gereja eme ingan Dibata encidahken kekelengen man kerina jelma.

Engkelengi ras ngalemi e enggo ituduhkan Dibata nandangi bangsaNa, tupung bangsana lit i taneh pembuangan Babel. Pernah nabi Jeremia ngerana nina, 'sabar dinging megenggenglah kam, sabap Dibata erbahan rancangan damai sejahtera man bandu, iberekenNa man bandu masa depan si mehuli' (bd. Jer. 29:11). Kenca bangsa Israel pitu puluh tahun i pembuangan, Dibata nehken padanNa, alu make raja Kores, si naluken raja Nebukadnezer.

Teridah maka Dibata ngalemi perbahanen bangsaNa, ras ikelengiNa bangsaNa alu mulahisa i bas pembuangan nari. IsikapkenNa pe wari-wari si mehuli man bangsa Israel. Emaka nina Nabi Jesaya, daramilah Tuhan tupung banci denga jumpa ras IA, ertina Tuhan e situhuna ndeher kal ras bangsaNa, iperdiatekenNa nge kegeluhen bangsaNa. Darami ningen e ngikutken kai si ikatakenNa arah nabi-nabiNa. Selaku Gereja, si umbanlah perbahanen Tuhan. Si bangun hubungan si mehuli man doni enda guna encidahken kekelengenta.

☞ "Daramilah Tuhan alu nehken kekelengen"

## Buah Persadan Ras Dibata

Ogen: Perbahanen Rasul-rasul 2:42-47

Minggu,  
09 Agustus  
2020



**I** bas Gerejanta lit dua sakramen eme Lakon Persadan Si Badia ras Lakon Peridin Si Badia. Sakramen enda bentukna sakral, suci, badia. Sakramen e nuduhkan Kata Dibata si teridah (Firman yang kelihatan). I bas ngelakoken sakramen e, jadi sada simbol kita ersada ras Tuhan. Subuk bas kematenNa bagepe kekekenNa. KematenNa e erkiteken nanggung kerina dosa-dosanta, si arusna kita nge nggengkenSa. Bas keleng ateNa kerina e igengkenNa. KekekenNa e nuduhkan maka kematen enggo italuken, Tuhan Jesus menang, janah kerina kalak si tek baNa pe pagi ipekeke bas si mate nari, nangkih ku surga ersada kita ras IA.

Buah persadanta ras Tuhan e teridah me arah bahan renungenta enda si nuriken kerna kegeluhen jemaat mula-mula. Nggeluh ia si keleng-kelengen bagi si ersenina, tetap pulung megiken pengajaren rasul-rasul, janah kai si lit i bas ia ipakena ras-ras. Ertina nggit erbagi ras temanna subuk pangan, bagepe erta entah duit. la aru atena sabap lit pengarapenna, Tuhan encukupken kerina keperluanNa.

Jadi, sakramen si ilakoken kita i Gereja Si Badia, la terjeng seremonial. Teridahlah min buahna bas kegeluhenta si teptep wari. Kinitekenta man Tuhan Jesus si enggo nebusi kita jadi palas i bas engkelengi teman-temanta, alu nggit kita erbagi kai si lit bas kita. Lit pengorbanenta guna kiniulin teman-temanta. Tetap si peteguhi persadanta alu tutus reh ku perpulungen, ngikuti dahin-dahin perpulungen, dingin tutus megiken pengajaren Tuhan. Teridah ulihna man banta bagi man perpulungen si pemena ndube, eme ertambah-tambah kalak si tek man Tuhan Jesus dingin bengket ku perpulungen e.

✎ *"Perbahanen kekelengen badia i lebe-lebe Tuhan"*

# Ermengkah Teptep Wari

Ogen: Masmur 19:1-7

Senin,  
10 Agustus  
2020



**R**atur eme sada tanda pendahin Dibata. IbenakenNa nepa doni enda alu kuasaNa dem bas keteraturen, ertorosen wari lepas wari. Seh ku pendungina itatap Dibata kerina si ijadikenNa tuhu-tuhu mehuli. Kiniraturen si ibahan Dibata e erbahansa kegeluhen doni enda erdalin bagi arusna. Langit encidahken kemulian Dibata, awang-awang erberita kerna perbahanenNa. Tep-tep wari erberita kempak wari si pagina, tep-tep bergni nuri-nuri kempak bergni si pagina ka. Teptep erpagi-pagi pultak matawari seh ka ku benna. Kai pe la banci cebuni i bas las sinalsalna nari.

Pendahin ras perbahanen Dibata e erbahansa kegeluhenta si teptep wari tertata alu mehuli. Janah nggeluh alu ratur e sada awih-awih perbahanen Dibata. Keteraturen nggeluh enda me siniirapken i bas kita nari. Tupung suari kita erdahin, tupung bergni kita pekesahkan, lit keseimbangan pendahinta, lit paksa kita emperdiateken sekelewetta, radu ras kerina si itepa Dibata. Si bahan paksa mpekena-kenasa sabap man banta me iendesken Dibata dahin e.

Adi si tatap bekas pendahin Dibata e, la kap lit dalanna la ermengkah ate, sabap labo kita ngasup erbahansa bagi si enggo ibahanNa e. Kita tading ngenanamisa. Salah sada keteraturen geluhta eme ermengkah teptep wari, sabap kesah kegeluhen si aloken denga teptep wari, jantungga erdetak normal, kerina ringring kulanta erdalan alu mehuli, kesempatan tetap iberekenNa lako ndahiken dahin si enggo iendeskenNa man banta. Kalak si ngasup ngidah ras nggejapken kiniraturen perbahanen Dibata e nge si ngasup teptep wari ngataken bujur. Janah idahikenna dahin mpekena-kena doni enda alu palas pengataken bujur.

☞ *"Biasaken nggeluh alu ratur"*

# Tutus Ndahiken Si Mehuli

Ogen: Kuan-kuanen 11:19-20

Selasa,  
11 Agustus  
2020



**I** tengah-tengah tantangan jaman si reh kacauna enda, perlu kal kita nggeluh alu tutus, kesempatan si lit si pake alu tutus. Tutus erkiniteken tentu banci mpesenangkan pusuh perukurenta; tutus erdahin tentu si aloken kai si iarapken kita; tutus erlajar tentu reh pentarna; tutus nggeluhkan kegeluhen tentu ipasu-pasu Dibata kerina. Tutus ertina, kai pe si lakoken kita ilakoken alu ukur, pusuh, semangat dingin nggejap maka sie kerina kesempatan si ibereken Dibata man banta. Doni enda nawarken man banta kerna kegeluhen si la payo, umpamana: alu la erdahin pe banci ndatken sen mbue (erjudi), la pe tutus erkiniteken mejuah-juah nge (mindu gegeh man kuasa gelap), la pe erlajar, lulus ka nge (nyogok). Tentuna si enda labo payo rikutken Kata Dibata si oge kita arah bahan paksa tenengta: "Ise tutus atena ndahiken si mehuli, nggeluh me ia, tapi ise tetap erbahan jahat mate me ia." Kata enda nuduhkan maka ketutusan e penting, apaika tutus ate ndahiken si mehuli, erkiteken kalak si tutus i bas dahin si mehuli tentu ialokenna ka me si mehuli i tengah-tengah kegeluhenna. Adina kita tutus ndahiken si mehuli, la terjeng dirinta ngenca ngaloken keriahen dingin kemalemen ate, tapi man tinepa si deban pe ndatken kemalemen ate erkiteken perbahanen si mehuli si idahiken kita. Umpamana: tutus ateta njaga lingkungan, la ngambekken sampah sembarangen, tutus erkiniteken teridah arah perbahanen, pengerana dingin caranta erteman ras ise pe. Kesangapen, keriahen dingin kemalemen ate tetap sialoken adina kita tutus dingin erkemalangen man Tuhan.

☞ *"Tutuslah tetap erbahan si mehuli gelah reh mallema ateta!"*



Sada wari penulis itelepon sekalak Moria nuriken kerna pergumulenna. Arah penuri-nurina maka tempa lanai lit serpang puluh. Mberatna persoalen kegeluhenna erbahansa menam bene kinitekenna. Seminggu kenca kami ertelepon, ibuatna sada kesimpulen, nina: Dibata tetap nehken keleng ate man bana. Moria ndai nggejapken maka Dibata labo pernah nadingken ia, bage pe Dibata tetap si njayam kegeluhenna. Persoalen si lit banci saja reh kelekna si man tangkelen, lenga dung sada masalah e nggo ka turah masalah si mbaru.

Daud selaku suruh-suruhan Dibata pe melala ndatken persoalen i tengah-tengah kegeluhenna. Melala kalak si ersura-sura lako erbahan si jahat man bana janah melala ka ranan si la payo si seh man bana kerna dirina, tapi kerina si jadi man bana e ijadiken Daud guna mpeteguhi kinitekenna. Daud la fokus ku bas sura-sura kalak si erbahan jahat man bana, tapi Daud lebih fokus nandangi keleng ate Dibata si tetap njayam kegeluhenna (O Tuhan, andiko ergana keleng ateNdu si tetap e, ikawaliNdu kami i teruh kabengNdu). Daud tetap ngidah keleng ate Dibata kempak kegeluhenna, aminna gia melala kebiaren-kebiaren si man alanken. Daud tetap ngidah cara Dibata si nehken kinibujuren man kalak si tetap ngarap man Dibata.

Pengarapenta pe i bas kita ndalani wari-warita, aminna gia megati si man dalanen e la bagi ukurta, tetaplah kita fokus ku bas cara Dibata njayam kegeluhenta, tetap kita nggejapken maka Dibata si dem keleng ate e labo pernah nadingken kita anak-anak si ikelengiNa. Marilah tetap si gejapken penjayamen Dibata nandangi kerina dampar geluhta.

## Ertoto Dingen Erdahin

Ogen: 1 Tesalonika 1 : 2-5

Kamis,  
13 Agustus  
2020



Sada pengalamanen kegeluhenku i bas ertoto 'menaken kitik kitik nari kugejapken kal gegeh pertoton i bas geluhku erkiteken sie iajarken Bapa man kami anak-anakna. Entah kai pe perbeben i bas jabu tetap ikataken bapa maka ula lupa kita ertoto man Tuhan pasti lit serpang pulah ibahan Tuhan man banta. Megati kal kuidah itokohi kalak bapa, isampatina kade-kade ipinjamna sen guna usaha seninana, ence lanai iulihken seninana sen ndai, rubat ia ras nande sabap komplain nande. Nina 'man kai kin sampati kalak adi tokohina nge kam.' Nina Bapa 'labo dalih lit nge Dibata tetap sitotoken man Tuhan gelah lit rejekita gelah tergalari kita utangta e.' La pernah bapa nggit nubuki kai si la mehuli ban kalak sideban man bana, tapi andalkenna tetap Tuhan arah kuasa pertoton, janah tetap ku idah anem uga gia bapa sibukna tep-tep erpagi pagi tetap ipujina Tuhan ertoto ia mindo gegeh man Tuhan. Ngidah si enda kerina aku bertumbuh i bas gegeh pertoton. Gegeh pertoton enda ka me sikuajarken man anak-anak i bas tengah jabu maka kia pe sinidahiken arus idasari gegeh pertoton, janah kai si enggo itotoken arus ka sidahiken.

Ertoto dingen erdahin enda me jadi biak kalak Kristen i bas kegeluhenna. I bas suratna sipemena man perpulungen Tesalonika, bindu 1:2-5, Paulus ngajuk perpulungen gelah tetap nggeluh i bas pertoton, sabap nina tetap kam kuinget i bas pertotonku, sabap i bas Tuhan idah kami kuga kam nuduhkan kinitekenndu arah perbahanenndu, latih kam ndahiken dahin kekelengen, dingen tetap ukurndu i bas pengarapen man Tuhan. Ngasup perpulungen ngelakoken si enda sabab tetap ia ngaloken gegeh i bas pertotonna.

☞ *Pertoton e jadi kesahi kegeluhen kalak si tek.*

## Erdahin Eme Pertoton

Ogen: Markus 16 : 20

Jumat,  
14 Agustus  
2020



**N**ina Martin Luther King Jr "menjadi seorang Kristen tanpa doa sama dengan kehidupan orang tanpa bernapas" bagepe Oswald Chambers pe pernah ngatakan maka nina "doa adalah nafas kehidupan orang Kristen, bukanlah apa yang membuatnya hidup namun bukti bahwa dia hidup." Perkatan dua kalak tokoh enda ngajuk kita gelah ula kita pernah lupa nggeluh i bas pertoton sabap pertotonta eme kegeluhenta. I bas kerina kesibukenta, ndahiken dahin iajuk pe kita nggejapkan maka erdahin e eme pertotonta. Adi nina Johanes Calvin, pendahin eme anugrah Tuhan. Tentu kai si enggo ibereken Tuhan guna banci si dahiken arah pendahinta eme pertotonta man Tuhan. Alu bage kai pe pendahinta ula si korupsiken erkiteken pendahinta eme pertotonta. Kai pe si lakoken kita arah pendahinta la e jadi tujun, la kita ngadi erdahin erkiteken kerangapen, janah kai si enggo si dat arah pendahinta e pe la ternikmati kita dengen la ernanam man kalak si enterem. Adi bage pendahinta e lanai jadi pertoton. La kita mbiar i bas ndahiken dahin erkiteken si gejap pendahinta e maba pasu-pasu man kalak sideban.

Renungenta wari enda nuriken maka lawes ajar-ajar janah erberita ia ku japa pe, Tuhan nampati ia i bas kerina dahinna, janah Tuhan pe ikut erdahin ras kalak enda. Ibahan Tuhan maka kalak enda kerina pang mberitaken berita i bas Dibata nari, janah i japape jadi tanda sengget ras tanda kuasa sideban. Lit kuasa i bas ndahiken dahin Tuhan. Tentu kita pe kerina Moria i bas ndahiken dahinta tetaplah si gejapkan lit kuasa pertoton emaka tutus ateta ndahiken pendahinta.

☞ *"Pertoton eme kesah, tetaplah erdahin ras ertoto"*

# Teman Si Kelengen

Ogen: **Johanes 15:13-15**

Sabtu,  
15 Agustus  
2020



“*Lanai bo kam Ku gelari juak-juak sabap juak juak la ietehna kai si ibahan tuanna. Tapi Ku gelari kam teman-temanKu sabap man bandu enggo Ku peseh kerina si enggo Ku*

*begi i bas BapangKu nari.*” Dibata enggo njadiken kita temanNa, teman guna ikelengiNa. Tentuna sura-sura Dibata i bas njadiken kita temanNa, gelah kita pe ngasup njadiken kalak si deban jadi teman-temanta. Kita ijadiken Dibata temanNa adi kita nggit ndalanken pedah-pedah si ipeseh Dibata man banta.

Sekalak teman tentu nggit mpersingeti adina temanna erbahan salah. Sekalak teman tentu mperdiateken temanna tupung temanna e lit i bas paksa persoalen, sekalak teman tentuna itandaina biak-biak teman si ikelengina e janah sekalak teman tentu notoken temanna dikune teman e melala si man tangkelenna.

Ndarami teman si kelengen i bas jaman enda tuhu mesera. Bagi lit kuan-kuanen kalak Karo, “teman tawa e banci nge mbue tapi teman tangis e la piga si nggit.” Teman si kelengen ertina teman tupung tawa bage pe teman tupung paksa kesusahan. Teman si kelengen tentuna mereken dampak si mehuli nandangi teman si itemanina e. Bagi Dibata si nehken kekelengen nandangi kita manusia. Nggit IA ngasamken kesahNa gelah kita si enggo ijadikenNa selaku temanNa e, ndatken keselamatan.

Dibata nggo ngerana man banta arah kataNa, maka kita enda enggo ijadikenNa temanNa. Marilah kita kerina selaku teman si nggo ngaloken kekelengen i bas Dibata nari, si jadikan ka temanta manusia jadi temanta, aminna gia lit kekurangan i bas diri temanta e.

“*Dibata njadiken kita temanNa, kita pe rutang lako engkelengi temannta*”

## Kekelengen Si Serta

Ogen: **Johanes 3:16**

Minggu,  
16 Agustus  
2020



**K**eleng ate Dibata nandangi kita manusia serta kap. Keleng ateNa kempak geluhta la ersyarat (iberekenNa AnakNa si tonggal gelah kalak si tek la bene tapi dat kegeluhen si rasa lalap). Tentuna keleng ateNa e jadi

pergegeh man banta gelahna kita pe ngasup nehken kekelengen nandangi temanta manusia. Keleng ate Dibata man manusia tetap icidahkenNa nai nari seh asa gundari.

Kesaksin i bas Pustaka Si Badia melala encidahken kerna keleng ateNa si serta, misalna: Dibata si tetap ngarak-ngarak kegeluhen bangsaNa ndarat i Mesir nari nuju ku Tanah Kanaan. Aminna gia bangsa e megati la ngidah keleng ate Dibata, aminna gia bangsa e nilah arah keleng ate Dibata; tapi Dibata si sembah e tetap nehken keleng ateNa man bangsaNa, seh ku tujuan si enggo itetapkan Dibata. Keleng ate Dibata nandangi nabi-nabiNa, i bas nehken kerna kebenaren Kata Dibata, maka megati nabi-nabi e ndatken perlakun si kurang payo (isiksa, ihina ras ihukum) tapi Dibata tetap nehken keleng ateNa.

Mulai jaman nini-nininta nai seh asa jaman gundari keleng ate Dibata e tetap icidahkenNa. Contoh si kitik eme arah matawari si tetap iberekenNa man banta; subuk si malang man baNa bage pe man kalak si la malang man baNa ntah udan man si bujur ras la bujur, kerina ngalokenca. I bas kesuliten si iadapi kita pe tetap nge teridah Dibata erkeleng ate man banta. Mberat si man tangkelenta tapi la kita labuh tentuna e erkiteken Dibata tetap nehken keleng ateNa si serta man banta. La ate Dibata anak-anakNa nggeluh i bas perbeben emaka keleng ateNa e tetap i berekenNa man banta.

☞ *"Serta kap keleng ate Dibata e nandangi kegeluhenta"*



**S**ekalak kulit hitam, si enggo berhasil ndatken pendidikan tinggi, kedungenna ikut mimpin gerakan guna ngapusken apartheid ras rasisme. Sekalak diberu si pernah nenganami perdagangan diberu i Amerika, kenca enggo bebas, ia pe dungna ngelakoken gerakan ras mendirikan lembaga si erjuang guna memberantas perdagangan diberu ku Amerika bagepe ku negara si deban.

Enda me situhuna tujun penebusen menurut rasul Paulus man perpulungen Roma. Kita bebas erjuang mbebaskan kalak si tertaban. Tujun Dibata mbebaskan kita i bas kuasa dosa eme kegeluhenta enda lanai ikuasai dosa. Janah kegeluhenta pe enggo ikhususken guna ngelakoken perbahanen si mehuli, eme guna ikut meritaken Berita Si Meriah, bali ras si ilakoken Rasul Paulus.

Bage ka me situhuna tujun Dibata mereken kemerdekaan man bangsata Indonesia. I bas wari si sendah enggo 75 tahun Indonesia merdeka. Janah selaku kita kalak Kristen la saja ngenca kemerdekaan secara politik ras fisik sialoken kita, tapi kita pe enggo itebus Dibata i bas kuasa dosa nari. Emaka i bas kita mperingeti kemerdekaan enda, si endeskenlah gegeh, kepentaren entahpe talenta bagepe pendahinta guna ikut memajukan ras mbangun negaranta enda. Janah kita pe tetap semangat guna ngelai, sabap enggo ka nge kita leben ielai Dibata. Kita ikut muat bagin guna mbebaskan kalak i bas kinierdosan, kebiaren bagepe kurang erkiniteken man Dibata, sabap enggo leben enda ilakoken Dibata man banta. Emaka ikataken kami man banta kerina : Merdeka! Merdeka! Merdeka

☞ *Kita enggo bebas genduari, sabap Kristus enggo mbebaskan kita* "

## Dibata Si Encukupken

Ogen: Matius 6:11

Selasa,  
18 Agustus  
2020



**A**di si perdiateken i bas sada acara si ilakoken i Gereja entah pe i hotel, kususna tupung man, alu prasmanan, megati si idah sekalak bapa si melala ibuatna bengkauna padahal kari labo terkerikenna pe, lit ka pernanden enggo ka ibuatna kantong plastik, ibungkusina ka ikan selain bas piringna, padahal enterem denga kalak lenga man. I bas kasus sideban lit ka kalak enggo pe melala kinibayakenna, mbelang jumana, tapi lalap ka rubat ras senina erkiteken kurang mbelang akapna taneh tading-tadingen orangtuana si jadi sikerajangenna.

Dua gambaren enda encidahken kalak si la ngasup nggejapken cukup i bas geluhna. Sekalak filsuf pernah ngatakan, kerangapen ras kesusahen enda sada palasna eme kelangasupen ngatakan bujur ras nggejapken cukup i bas geluhna. Iakapna adi kai pe mbue i bas geluhna, enda nari me si erbahanca cukup. I bas Pustaka Si Badia pe melala si idah contoh-contoh kalak si la ngasup ngatakan cukup. Misalna bangsa Israel si isimpanna Manna si ibereken Dibata, erkiteken mbiar ia lanai lit pagi. Entahpe anding-andingen kerna kalak bayak si ipegalangina lumbungna, iakapna enda erkiteken kinibeluhenna ras si mereken jaminen kegeluhenna. Cara rukur si bage me si itentang Jesus ras si isingetkenna e man ajar-ajarNa, arah pertoton si ajarjenNa. Arah perenungenta enda, isingetken maka situhuna kegeluhenta si teptep wari pe Dibata nge si encukupkensa. Labo erkiteken si gegehi erdahin entahpe encari, labo erkiteken usahata saja, entahpe kinibeluhenta jine, tapi kerinana pelin-pelin erkiteken Dibata si merekensa. Emaka erlajarlaha kita ngatakan cukup ras ngatakan bujur i bas geluhta.

☞ "Emaḡa cukup min siaḡap adi lit naḡanta ras uista"



**K**erna kerangapen Leo Tosloy pernah nulisken i bas sada buku nina : seberapa luaskah tanah yang anda butuhkan? Sekalak perjuma si sukses pernah ituliskenna maka la pernah ia puas asa belangna taneh si jadi sikerajangenna sabap tetap nge ipebelangina taneh si enggo lit, la erbaleng belangna tetap nge lit sura-surana guna nukursa. Emaka i bas bukuna ndai Leo ngatakan adi bage asa pe banci tanah enda jadi sikerajangenndu adi banci kam mentasisa alu erdalan nahe seh kari karaben asa si enggo ibentasinđu asa sie kari jadi sikerajangenndu. Bagem si perjuma si merangap ndai kiam ia erkiteken tujunna gelah mbelang kari datna juma ndai ope denga gelap wari. Tuhu ope denga gelap wari enggo terdalanina ratusen hektar perban semangatna. La ingetna man ras minem perban biarna la mbelang idatna. Tapi nina Leo i bas bukuna ndai dungna si idat perjuma ndai 1x2 meter ngenca, perban latihna akapna erdalan ras kiam, la man, la minem guna ndatken juma la erbaleng ndai dungna mate me ia i bas berngi e. Endam upah merangap, lanai ternikmatisa kegeluhen ras ulihna latih. Kalak si merangap lanai lit kekelengenna nandangi kalak si deban erkiteken sikerajangenna saja ngenca si perjuangkenna.

Kalak si ersura-sura bayak banci tapi adi kalak si merangap nandangi erta ras duit eme bena-bena kerina kejahatan (1 Tim. 6 : 10) kalak si merangap nandangi duit lanai nggeluh i bas kiniteken janah maba kecedan ate sabap lalap gulut ukurna erkiteken kerangapenna. Nanamilah pemere Dibata, labo man asuhen biak merangap.

## Bias Nge keleng AteNa

Ogen: Lukas 3:13-14

Kamis,  
20 Agustus  
2020

 **CUKUP!**

**I**bas pertoton Tuhan iajarken kita mindo "bereken nakan cukup i bas wari si sendah enda." Uga kin kerna cukup i bas pemahamenta, la erlebihen, sedang-sedang saja, la lebih apaika erlebihen, la kurang apaika kekurangan. Kalak si merangap tetap mastiken keamanan geluhna si sada, emaka la ia mbiar ngorbankan kalak sideban gelah geluhna aman. Tapi kalak si nggejapken cukup pemere Dibata man bana tetap ngasup ngataken bujur i bas sikugapana pe kegeluhenna. Cukup 'keugaharian' banci turah bas penggejapen spritualitas maka Dibata mpeseh kekelengenna la man banta saja tapi pe man kerina jelma si lit i bas doni enda. Tanda keleng ate secara universal man kerina jelma, emaka uga banci kerina jelma menikmati pemere Dibata e alu adil ras menikmati kegeluhen si berkelanjutan. Adi tep-tep wari si imani secukupna enda erpalas ku bas Matius 6:11 "bereken min man kami nakan cukup i bas wari si sendah enda" bagepe Lukas 11:3 "Bereken min man kami nakan cukup tep-tep wari" ertina duana ngingetken kita teptep wari Tuhan mereken nakan cukup, ras keperluan geluhta cukup. Pertoton enda mabai kita ngasup ngataken bujur i bas kai si enggo ibereken Tuhan man banta tep-tep wari. Adi si gejapken kekelengen ras pasu-pasu Tuhan man banta si tep-tep wari me labo nggo pernah kita kekurangan? Banci saja salu matanta jine lenga si idah uga cara Tuhan ngelitkensa i bas kegeluhenta, tapi tetap lit ras maler pasu-pasu Tuhan man banta. Isuratken i bas Lukas 3:13 "ola pindo buen asa si enggo itentukan" ertina i bas Tuhan enggo lit kerina beliganna, nanami ras kataken bujurlah.

 *"Tuhan nikapken keperluan geluhta teptep wari"*

## Si Ngelai Si Mbelinna

Ogen: Matius 20 : 26-28

Jumat,  
21 Agustus  
2020



**S**ekalak aktor si terkenal Artur Barcis i bas negara Polandia nari pernah memerankan sada film. La ia ndekah teridah i bas cerita film i bas episod-episodna tapi tetap ia lit i bas kerina episod film enda. Janah kai sinilakokenna i bas film enda kerina maba perubahen semangat man kerina penontonna. I bas film enda lit sekalak diberu si atena mengakhiri geluhna erkiteken ia la iergai, pergumulen batinna enggo mengakar erkiteken tertekan. Kehadiren Artur Barcis i bas film e mengawasi, ia masuk ku bas peristiwa si seh kal mesangatna labo guna menyelamatkan diberu enda tapi kehadirena mereken kesadaren maka kematen la sada keputusan si ndungi persoalen. Dungna diberu enda ndai selamat la arah niatna mate tapi guna ngergai dirina jine. Bagem buena perbebenta i bas doni enda si menam lanai lit tampukna, si megati lanai kita nggeluh i bas pengarapen. Tapi bahanlah maka kehadirenta lit nanamna man kalak si deban. Pengerananta banci ngubahken keputusan kalak si lanai lit tujunna nggeluh berubah jadi si ngergai kegeluhen. Muat baginlah kita guna ngelai kalak sideban, ngelai temanta enggo me kita ngelai Tuhan. Matius 20:26-28 ise atena jadi kalak si mbelinna maka arus ia ngelai man kalak sideban. Janah ise atena jadi pemimpin ia arus jadi suruh-suruhendu kerina. Arah renungenta sendah ibabai kita nggit muat bagin i bas ngelai, kai pe pendahinta tetaplh min ernanam kegeluhenta man kalak sideban. Sabap si ngelai me si mbelinna i bas kegeluhen ras Tuhan, ula nimai tapi muat bagin menaken arah sikitikna ije me baginta si mbelinna i bas Tuhan.

“*Jadilah kalak si ngasup ngataken bujur i bas kerina paksa*”

# Kentisik Tapi Erguna

Ogen: Matius 11:10-11

Sabtu,  
22 Agustus  
2020



Sada istilah i bas dunia sinematografi eme 'cameo' sada sosok pemain tampil sekilas saja tapi iperanken kalak si terkenal. Amin i bas peranna tempa la penting, tapi i bas perdalanan

cerita e jadi penentu turi-turin si lit. I bas Pustaka Si Badia la sitik kalak si isuratken gelarna 'si iakap kalak kitik' la berarti, tapi banci maba perubahren si mbelin. Umpamana, Maria ras Marta turang Lasarus. Ntah sekalak nande si la isingetken gelarna tapi tek kal ia man Jesus maka anakna si sakit banci ipepalem Jesus. Bagepe sekalak tentera Romawi si tergelar Kornelius, jadi ingan nuriken maka Dibata ngaloken ise pe erpalas kinitekenna.

Rikutken renungenta, enda me si lit i bas diri Johanis peridiken, si mentas saja tapi menurut Jesus ia me si mbelinna i bas kerina manusia si nggeluh i doni enda. Kentisik kal geluhna, mentas saja nge kepe desken ende-enden duka Moria Se-GBKP, tapi mere warna ras erti kegeluhen i bas doni. La saja jabu, keluarga, masyarakat tapi doni enda. Keselamatan si enggo isikapken Tuhan man doni ras isina. Banci saja i bas geluhta enda, kita desken cameo, labo kita kalak penting, terkenal, hebat, iergai, ipuji-puji dingen iiget kalak si enterem. Amin bage pe geluhta meherga i bas Dibata. Sabap desken lagu si iendeken Ahmad Albar: "dunia ini panggung sandiwara" kerina manusia lit peran si imainkenna. Asa naskah si enggo ibereken man banta, si peranken, ula mengga ateta bagin kalak sideban. Ula si morahi si la sikerajangenta. Asa ngasup ras gegehta, si dalani baginta. Eme si enggo isikapken Dibata. Amin banci saja kitik iakap doni enda, tapi mbelin tah kitik e kerina lit sukat-sukatna i bas Dibata.

☞ "Lakoken baginta, kentisik ntah kitik, banci erguna man doni enda"



**P**eran si idalani kita la saja ngisi perdalanan geluh tapi pe arah kai silakoken kita banci ncidahkan kuga biak ras kehadiran Dibata i bas doni enda. Megati si begi kata si ibelaskan kalak sideban, i ja paksa ia lit i bas perbeben si mberat, i je idatna ka penampat i bas kalak si deban nari. Minter terbelas 'Dibata kal sinampati aku, Dibata kal si nuruh kam nak.' Bageme i bas kerina kiniulin, persinget ras biak banci si idah Dibata i bas diri kalak sideban.


Bageme kegeluhen dua kalak si ersenina Jakub ras Esau, perkara ngaloken pasu-pasu i bas bapana Ishak, itokohi Jakub bapana, emaka hak ngaloken pasu-pasu selaku anak sintua lanai idatken Esau. Emaka ersura-sura nge Esau munuh Jakub, si erbahanca Jakub kiam ku kuta mamana Laban dengen erjabu i jah. I bas paksa si enggo ndekah mulih Jakub ku kutana, tuhu ertedeh ate ia nandangi seninana Esau. Amin lit nge kebiaren i bas dirina, ibunuh Esau me ia tapi ipala-palaina alu maba melala hadiah man seninana e. Kepe arah dampar si deban, Esau pe seh kal atena tedehna agina e. Keleng ate ras tedeh ate meneken dendam si mbelin, emaka labo teralokenca pemere-pemere Jakub. Seh erbelas Jakub nina 'ngidah ayondu saja bali kuakap natap ayo Dibata, perbahan ulina perbahanenndu man bangku.' Kata enda labo mendewaken, ntah pe njadikan Esau Dibata tapi i bas keleng ate, pengampunen ras kiniulin si icidahkan Esau, tangkas inanami Jakub keleng ate Dibata.

Bageme kita i bas geluhta, si cidahkan, si sehken ras si saksiken kiniulin Dibata man doni enda arah geluhta. Iidah kalak min kemuliaan Dibata i bas ayota, i bas perbahanenta, i bas keleng ateta si tep-tep wari.

# Ngelai Alu Kekelengen

Ogen: Lukas 10:25-34

Senin,  
24 Agustus  
2020



Kalak Samaria terkenal la erteman ras kalak Jahudi. Kalak Samaria pe megati ikataken kafir, la erdibata. Adi si oge Lukas 9:51-56, maka Jesus itulak i Samaria, si erbahanca nembah ate ajar-ajar Jesus reh belinna nandangi kalak e. Arah renungenta sendah nuriken maka la banci kita me'label' kalak sideban alu pengakap si la payo. I bas geluhta, pasti tetap lit si mehuli, i tengah-tengah si la mehuli e. Emaka turi-turin kerna kalak Samaria enda ibahan Jesus jadi cara nuriken maka tetap lit denga nge kalak si mehuli i bas kegeluhen enda.

I bas renungenta enda ituriken kerna kalak Samaria si erkuah ate. Ibenaken Jesus njabab kalak Jahudi kerna perbahanen ndatken kegeluhen si rasa lalap. Si ndabuhna eme ngkelengi Tuhan Dibata ras teman manusia. Isekin teman manusia, Jesus nurikenca alu sada perumpaman. I bas teks enda labo lit ikataken kalak Samaria si perkuah tapi judul perikopna ibahan e judulna. Jesus mereken perbandingan ras dua kalak sope kalak Samaria si jumpa ras kalak si kena rampuk. Si pemena eme mentas sekalak imam sipeduaken kalak Lewi, duana la nampati kalak sikena rampuk e, si peteluken mentas kalak Samaria, asa bahan si lit i bas ia isampatina, itamakenna minak ras anggur man luka, ibalutina, iangkatna ku das keledena dengen ibabana si sakit e ku penginapen gelah itambari.

Arah turi-turin enda kepe, labo si meteh surat, Imam ntah pe kalak Lewi si jadi teman, kalak mehuli i bas geluh enda. Kepe lit denga nge si iakap kalak la er-Dibata ncidahken perbahanen si mehuli. Emaka perlu kal kita mediate, ula minter me'label' kalak arah suku, agama ntah dahinna. Nterem kalak si dem perkuah ate, nampati alu kekelengen.

☞ *"Nterem kalak si perkuah, nggit nampati, aku salah sadana"*

# Nampati Dem Perkuah Ate

Ogen: Lukas 10:35

Selasa,  
25 Agustus  
2020



Penginapen eme sada ingan pekesahken, banci tading piga-piga wari i je alu newasa. Biasana igalari lebe maka banci kita tading i je piga-piga wari. Puna penginapen biasana ngaloken sen, labo dahinna mperdiateken kalak si tading bas penginapenna apaika seh ku bas kesehatenna. Sekali enda ituriken man banta pendahin sekalak pemilik penginapen si la bagi biasana. Tupung kalak Samaria nampati sekalak si sakit, si idahna enggo ampar bas dalam erkiteken irampuk penamun. Ibabana si sakit e ku penginapen si la ndauh bas ingan e nari. Ipindokenna man si mada penginapen e gelah si sakit e itambari. Iberekenna duitna si jadi panjar entah pe jaminen, janah nina ku tambahi pagi asum aku reh mulihken. la ituriken bas pustaka ndigan kalak Samaria e reh mulihken nggalari si la biasna. Si perdiateken perbahanen pemilik penginapen e, ialo-alona kalak sakit bas penginapenna, itambarina, ipekena-kenana. la iukurkenna ndigan igalari kalak Samaria e, alu ukur meriah isehkenna kekelengenna alu dem pengorbanen, penginapenna iingani piga-piga wari, lenga igalari, tambarna pe sada bagin denga ngenca ibereken, gegehna ras waktuna mpekena-kenasa la iperhitungken. Gelarna pe labo isuratken ertina labo teh kalak kai si ibahanna e.

Bage me Gereja iarpken nikapken ruang-ruang/ penginapen man kalak si kelsehen, si sakit bagepe pertandang si merluken penampat. Sehken pe kekelengen si la ngarapken semulih bas si isampati e nari, sabap ndai kin pe ia perlu isampati. Nehken kekelengen alu dem perkuah ate e me biak Tuhanta Jesus Kristus si perlu jadi usihenta.

☞ "Nehken keleng ate la ersyarat"



**N**ehken kekelengen alu la ersyarat eme sura-sura Gereja nai nari seh asa gundari. Nai i bas perpulungen si pemena (jemaat mula-mula) enda enggo ilakoken. Alu ersada ukur ras sada penggejapen i ras-raskenna kai si lit i bas ia. La lit sada pe i bas ia si kekurangan, erkiteken kalak si lit tanehna entah rumahna nggit ia ndayakensa, emaka iberekenna man rasul-rasul guna ibagiken man kalak si perlu penampat. Palas i bas ia nehken kekelengen e eme kinitekenna man Tuhan Jesus si enggo nelamatkan ia. Kata kunci ije eme 'sada ukur ras sada penggejapen.' La lit i je ngukuri dirina jine, egois entah merangap.

Lit denga nge biak sada ukur ras sada penggejapen e i bas Gereja si genduari? Kinata si teridah maka uga buena kalak si lit bas Gereja, bage ka buena sura-sura ras perukurena. Erkiteken nehi sura-surana, lanai terukuri sura-sura kalak si deban, apaika sura-sura Dibata. Em dalan dalanna i bas Gereja pe megati lanai tergejap kekelengen e. Lalan kalak si i bas Gereja e ngukuri dirina jine ras egois. La terbuka nandangi kalak si deban; si sakit, si kelehen entah kalak pertandang. Nggit korban adi lit untungna man bana, entah adi isuratken gelarna gelah ipehaga, dengen ieteh jelma si enterem. Ndingan nge Gereja e mulihken bagi jemaat mula-mula e?

Tek kita maka Kesah Si Badia nge ndube erdahin bas jemaat mula-mula, janah gundari pe Kesah e ka nge si erdahin bas GerejaNa. Alu erpengarapen man Kesah Si Badia e, rusaha pe kita ngeruntuhken keegoisenta, gelah banci kita sepenggejapen dengen seperukuren.

☞ *"Ngeruntuhken keegoisenta jadi dalan engkelengi"*

# Doni La Ngaloken Dibata

Ogen: Johanes 1:10

Kamis,  
27 Agustus  
2020



Lit telu pengertin doni i bas renungenta enda. Si pemena, Kata e enggo i bas *doni* enda. Erti doni i je eme inganta tading enda, inganta nggeluh. Si peduaken, *Doni* enda ijadien Dibata arah IA, doni ertina i je tinepa Dibata si meherga, iciptaken Dibata alu dem keleng ate. Si peteluken, tapi la itandai *doni* enda IA. Doni ertina i je manusia si nulak keleng ate Dibata.

Arah teluna pengertin doni enda ituriken man banta situhuna Dibata erkeleng ate man doni si itepaNa. Keleng atena e ituduhkanNa i bas kerehen anakNa Jesus Kristus ku doni tinepaNa, si jadi inganta tading ras ndalani kegeluhen. Tapi manusia si tading bas doni enda ikuasai dosa, seh maka la ngasup ngidah kiniulin Dibata, emaka itulakna Jesus Kristus e. Penulaken e teridah i bas perbahanen manusia si la ngergaken Jesus i doni enda. Ikataken manusia ndai maka IA anak tukang kayu, anak manusia biasa si cukup sederhana. Anak kuta Nasaret, kuta kitik si labo mehaga. Janah nina manusia e, Jesus e labo anak Dibata, IA teman Dibata erdahin, emaka labo gunana tek man baNa. Labo lit kuasaNa guna nebusi ras nelamatkan doni enda. Erkiteken si e, manusia ndai ersura-sura guna munuh IA, sabap labo atena jadi saingen jadi raja i doni enda. Curak penulaken manusia nandangi Anak Dibata e genduari pe melala denga. Lit si megi-megi tapi la idalankenna, lit si ragu emaka iikutkenna ka pengajaren si deban, lit ka si la kin nggit megiken kataNa, sabap sikapen akapna ndalanken sura-sura manusia si jahat, si la erkemalangen man Dibata. Tetap lit, nterem denga nge manusia la ngaloken Jesus. Janah nguru-nguru kalak si ngaloken e. Amin bage, tetap lah jadi pengikut sejati.

☞ "Ragu, tandana la tek nandangi kuasa Dibata"



**A**di sirenung-renungken, apai nge rusuren kita ngkelengi ntah erngena ate nandangi si ngena ate Dibata ntah si nembeh ate Dibata? Sabap i bas kegeluhenta i doni enda, erbage-bage caranta erngena ate. Lit sekalak anak, mehuli nge ukurna, tapi kai nina orangtua, meriah kin iakapna noganca. Lit rasa puasna adi nogan ntah pe la ndalanken kai nina orangtua. Apai si nembeh kal ate orangtua e akapna meriah ngelakokenca. Emaka lit kange orangtua meteh biak anak si bage, adi ola ningen minter ibahanna. Adi lakoken ningen minter kal ia ngadi. Alu bage perlu kal kita nandai biak-biak anakta. Banci saja i bas er-Dibata pe lit turah biak si bage rupana.

I bas renungenta wari enda teridah pertoton Jesus kerna kerina manusia ras doni enda. Ertoto Jesus gelah kerina kalak si tek si enggo iendesken man baNa banci ersada ras IA guna ngidah ras nenganami kemulian si enggo ialoken Jesus. Kiniersadan kalak si tek ras Jesus jadi sada dalam ras kesempatan guna mpelimbarui kegeluhen doni enda. Sabap i bas kiniersadanta ras Jesus e kita ipengasup ngelakoken si ngena ate Dibata. Sabap i bas Jesus me si enda kerina igenepi. Kalak si enggo ngaloken Jesus, ersada ras Jesus pasti tetap rukur ras ersura-sura erbahan si ngena ate Dibata. Perayakenna eme ndalanken si iarapkan Dibata dengen ia pasti erciga ate nandangi si ciga ate Dibata. Bagemekita arusna kalak si enggo ipelimbarui i bas persadanta ras Jesus. Mari tetap kita erjuang guna nadingken erbage-bage perbahanen si la uli. Seh me kita ku bas kegeluhen si mehuli alu bage ulih pertoton Jesus banci sinanami se gedang-gedang geluhta.

☞ *"Nggeluhlah ras lakoken lah singena ateNa"*

# Rembang Tengah Rukur

Ogen: Roma 12:2-3

Sabtu,  
29 Agustus  
2020



**B**eluh rukur, rembang tengah rukur, bujur rukur, si enda kerina ngajuk manusia bujur i bas kai pe si ilakoken ras iputuskenna. La sitik kalak mesera kal iakapna rembang tengah rukur, lit lalap berat sebelahna. Enda me si ikataken salah sada nepotisme, i ja lit dalam-dalanna ntah kai gia (teman meriah, kade-kade) erbahan kita mihak ia. Manusiawi kal biak si bagenda, lit hubungan emosional si jadi, seh maka i bas si la payo sitik-sitik pe e banci tempa si aloken. Rutang si akap man bana, apai ka kita enggo pernah sampatina: kiniulin, penampat ras sidebanna.

Renungenta wari enda ngajuk kita gelah ula seri ras doni enda, uga kin doni enda? Kerina biak-biak si la rembang tengah, nepotisme, ngkapiti si la payo man tadingenken. Kita arus ipelambarui gelah ndatken erbage-bage si mehuli, si ngena ate Dibata, si sempurna. Alu bage arus si bere dirinta gelah ipelambarui, ula mekeng, ula mesera man katanken. Terdauhen Paulus ngataken maka ulih kalak si ipelambarui e, enggo ngasup ia ngidah ras nergai kalak si deban uga litna, maka la iakapna ulin, hebaten dirina asangken kalak si deban. Perbahanen si bagenda labo menukah, sabap megati kal kita 'subjektif' menilai kalak si deban, keakunta si mbelin mpengaruhisa. Emaka perlu kal kita rukur alu rembang tengah. La ngenca arah kita sinilai tapi arah kalak si deban pe perlu posisinta tedis. Bagi kalak si berbeda pendapat antara angka 9 ras angka 6, jelas banci seri pengidah dikune kita tedis i bas posisi si seri. Di kune lang, lalap labo banci seri pengidahta. Moria GBKP arus ngasup rembang tengah rukur, subuk i bas ndidik anak, nengahi percakapen ras nehken diakonia.

☞ *"Rukur alu mehuli, ula ngkapiti sila payo"*

# Tetap Lit Pintu Ngalemi

Ogen: Matius 18:21-22

Minggu,  
30 Agustus  
2020



**N**galemi eme salah sada si ilakoken Tuhan Jesus i datas kayu persilang. I bas pertotonNa mindo IA man Bapa gelah ngalemi kerina kesalahen manusia ras doni

enda. "Alemi min ia kerina Bapa sabap la iangkana kai si ibahanna." Kai si ibahan Jesus enda nuduhken maka la mberat-mberatsa ras la mbue-mbuesa kesalahen ras dosa si ibahan kita, Jesus nggit ras ngasup ngalemi kita. Kai si ibahan Jesus e min jadi usihen man banta guna ngalemi kalak si ersalah man banta. Bagi si ituriken i bas renungenta enda maka lit sekalak budak, melala kal utangna man tuanna. Perban lalana lanai tergalarisa amin pe idayaken kerina erta-ertana, anak ras ndeharana. Mindo ia alu meseksek gelah raja mereken kesempatan man bana guna nggalari kerina utang-utangna e. Mekuah ate tuanna ndai man bana, emaka nina enggo ku sasap utangndu, lanai lit sitik pe si man galarenndu. Mulihlah kam, dahiken dahinndu bagi si biasana. Meriah kal ukurna erkiteken utangna enggo iputihken tuanna. Tapi bas perdalanen jumpa ia ras temanna si lit utangna man bana. Mis tangkapna kerah bajuna, ras mindo gelah utangna igalari. Amin pe temanna e mindo perkuah atena, la ibegikenna. Ipaksana gelah temanna e nggalari utangna. Enda ertina la nggejap utangna enggo igalari. La ia beluh ngataken bujur.

Utang dosanta enggo ilunasi Tuhan Jesus i kayu persilang, e min si jadi penggurunta guna ngalemi salah teman-temanta, keluarganta bagepe perbulangenta. Pintu pengalemi dosa lit bas pusuh erkiteken Jesus. Ngalemi salah perlu ngeruntuhken egois ras meganjang ukur.

☞ *"Alemi temannu erkiteken kam enggo ialemi Kristus"*

## Pintu Pengarapen

Ogen : Roma 5:5-8

Senin,  
31 Agustus  
2020



**P**engarapen eme kunci si mereken semangat bas kegeluhen. Kalak si erpengarapen ertina lit denga sura-sura nerusken kegeluhenna. Terdauhen, pengarapenta la terjeng nerusken kegeluhen doni enda, tapi keselamaten si enggo isikapken Dibata man banta arah diri Jesus Kristus. Kita enggo iperdameken ras Dibata alu ngalemi kerina dosa-dosanta. I datas kayu persilang Jesus mate, guna kita. Arah e Dibata ncidahken keleng ateNa man banta. Meriah ukurta erkiteken kita atan dat bagin i bas kemulian Dibata. Janah man banta pe ibereken Dibata kegeluhen si rasa lalap. Enda me si jadi pengarapenta si tuhu-tuhu. Pengarapen e me si erbahansa kita megenggeng amin lit gia kiniseran, sabar i bas ndalani kegeluhen amin melala jadi si la bagi ukur. Pengarapen e me si erbahansa kita megegeh ertoto man Dibata, janah pengarapen e nuduhkan kualitas kinitekenta. Desken sada pintu, lit dua sisina. Arah darat ras arah bas rumahta. Pintu e kite-kite kita jumpa ras kalak si deban, sabap adi ndarat ntah bengket ku rumah arus mentasi pintu e. Bageme pengarapen jadi pintu man banta guna natap ku wari-wari si reh, bagepe ku bas keselamatenta si tuhu-tuhu. Kalak si erpengarapen, lit hubungenna ras kalak si deban, lit hubungenna ras lingkungan sekelewetna. Ituduhkenna kinitekenna arah perbahanenna si mehuli man sekelewetna. La ibatasina dirina terjeng i rumah saja. Sabap i je ia aman, nyaman, tertutup la nggit ngalongo kalak si deban. Kalak si erpengarapen talangina pintu pusuhna guna ngelai, mereken si mehuli man kalak si deban. Amin bas ndalanken si mehuli e lit kiniseran ras lit perbeben. Kalak si erpengarapen dem pengataken bujur sabap igejapna Tuhan Dibata tetap nampati. La murah putus asa ras la mobah kinitekenna amin gia jadi si la bagi ukurna.

*☞ "Pengarapen erbahasan kita megegeh"*

## **Kata Penaruh**

**P**rdalinen geluh si man bentasen subuk si bagi ukur ras si la bagi ukur arus nge tetap si dalani.

Enggo piga-piga bulan dekahna kita i rumahken erkiteken pandemi virus Corona e, nterem kal jelma mbiar i belang-belang doni enda, padahal virus enda labo iidah alu matanta jine tapi dampakna la secara psikis ngenca turah tapi ku bas kerina dampak geluh, i ja perekonomin menam-menam lumpuh, si perbinaga tangis erkiteken binagana la lako, perjuma pe er-aru ate erkiteken ulih jumana murah man dayanken. I bas kepikten, kepaten la banci iban acara padahal kerehen perpulungen ras kade-kade eme si jadi pengapul ras pergegeh. Tempa-tempa kekelengen e pe lanai icidahken bas sekelewetta erkiteken kebiaren enda. Anak-anak pe kerina latih iakapna erlajar i rumah nari tugas melala ras megati ka orangtua pe jungut-jungut man bana. Enda kerina jadi beban emosional man tep-tep jelma si nggeluh denga. La banci bersentuhan padahal sedekah enda sentuhan pelukan eme gegeh i bas tengah jabu. Ku Gereja pe ras dahin-dahin Gereja la banci ilakoken ras peribadahen sidebanna enda pe erbahansa reh keringna bas kinitekenta. Tapi si enda kerina kenyataan si arus sialaken genduari. Ula situndalken Tuhan i bas situasi si bagenda rupana, si pejile hubungenta ras Tuhan arah kebaktinta i bas jabu, bagepe ibadah pribadinta gelah tetap kita megegeh. Penalementa eme Tuhan, Ku IA saja ngenca kita ernalem, adi la kin ras Tuhan labo kita ngasup ngalaken perbebenta si genduari enda. La sitik terjadi kejahatan, perampoken, begal, penipun, enda me dalanta metenget i bas ndalani geluhta. I bas edisi 65 paksa tenengta enda jadi palas mbangun hubungan ras Tuhan sabap i bas Tuhan ngenca kita megegeh. Katakenlah man pusuhta, Tuhanku belinen asangken masalahku. Tuhanku belinen asangken Virus corona.

## **Keterangan Sampul**

**K**esah Si badia nusur guna mpegegehi kerina kalak si tek man Kristus. Kesah e si peangkaken man banta kai si jadi i bas geluhta, si erbahansa kita megegeh i bas ndalani kegeluhenta. Kesah si Badia nusur ku doni enda mpetangkas keleng ate Dibata maka la kita itadingkenNa sisada, Kesah eme jadi gegehta si nemani geluhta. Gereja Tuhan tetap idemi Kuasa ras Kesah Si Badia emaka tangkas man banta Tuhan tetap erdahin i bas perdalinen kekristenen nai nari seh ngasa genduari. Kesah Si Badia eme jadi gegeh man banta si erbahansa la kita pernah talu ibahan kuasa si iblis. Tetap kita megegeh erkiteken lit Kuasa Kesah e si nemani kegeluhenta subuk i bas ndalani kegeluhenta si bagi *ukur* entah pe si la bagi ukurta.

Enggo 130 tahun *GBKP* itemani kesah Si Badia, i bas perdalinen waktu si enggo si dalani e seh ka paksana Moria *GBKP* ngelakoken Musyawarah Pelayanen (*MUPEL*) si ilakoken 5 tahun sekali. Mpertanggungjawabken dahin si enggo ilakoken sedekah 5 tahun enda, janah sekaligus pe periodesasi pengurus ras pemilihan pengurus Moria *GBKP* guna ndahiken dahin pelayanen. Kenca sie me ilakoken ka musyawarah i bas Klasis, Runggun bagepe seh ku sektor-sektor i belang-belang *GBKP* enda. I je me perlu kaderisasi pemimpin si banci ngelai i bas pelayanen Moria *GBKP*.

Dahin Gereja sinilakoken la terlepas i bas pendahin Kesah Si Badia si mperlengkapi kerina si nggit ndahiken dahin Tuhan, si mpegegehi ras peangkaken sura-sura Tuhan i bas dahin pelayanen. Ula sisia-siaken kesempatan sinibereken Tuhan man banta, tupung megegeh denga, tupung ngasup denga siberekenlah pelayanen si mehulina. Sabap lit pagi paksana lanai lit gegeh ras kesempatenta guna ndahiken dahin Tuhan. Emaka siberekenlah pelayanen si mehulina man Tuhan bagepe man temanta manusia.

*Ig BPP Moria GBKP.*

Paksa Teneng Moria

